

東
華
續
錄

東華續錄

光緒三十六

臣朱壽朋敬編

臣章圭璋恭校

秋七月丁卯朔時享 太廟遣載勛恭代行禮○岐元奏奉省於同治年間馬賊四出肆擾經大學士文祥帶兵將大股剿除餘孽未清復經歷任將軍都興阿等先後奏調客兵並由奉省陸續添練旗綠各隊分路駐紮梭巡緝捕地方漸就乂安而營制餉章尙未能一律旗營除捷勝營馬步隊仍照舊制但屬整齊各城所練洋鎗步隊係屬分城教練各有專司無須另議惟陸續添練綠營之隊有零星尙未成營者各營餉章亦未畫一由奉自練之隊均係查照直隸練軍章程給餉所調練軍直字中營直字前後營馬隊係照該營舊章給餉領項稍有參差奴才體察情形地方遼闊兵力不敷分佈而餉需未充不能多練只可就現有之隊酌量添練歸併成營放餉章程統歸一律以符營制而專責成現查綠營馬步隊記名提督左寶貴統帶之親軍馬隊業於光緒五年十一月歸併成營卽作爲奉字中營親軍毋庸添改其記名提督劉景芳統帶之直字前後兩營馬隊擬改爲奉字前後兩營又記名提督王佐臣統帶之直字中營二百名擬再添練五十名作爲奉字左營又光緒三年八月添練洋礮馬隊五十名洋鎗馬隊五十名

擬再行添練一百五十名歸併一營作爲奉字右營又親軍步隊祇有一百名擬再添練一百名並將光緒三年八月津軍營官馬魁兼之步隊三百名歸併成營共計奉字前後左右中馬隊五營奉字中營步隊一營除王佐臣劉景芳仍各帶各隊此次歸併之右營馬隊中營步隊併交左寶貴統帶訓練所有馬步隊一切領項統照直隸練軍章程給發以歸畫一統籌全局兵力尙單俟後籌有餉需再行酌量添練提督宋慶現赴各海口查勘地勢俟其擇定要隘布置教軍駐紮後奉省制兵應如何教練再行隨時會商辦理得 旨奉省現已酌添練軍歸併成營當隨時認真訓練整頓營規不得有名無實○丁寶楨奏川省一百數十廳州縣添設鋪司兵三千八百四十四名每年額支工食二萬四千一百四十餘兩歷由各廳州縣在於地丁銀內扣留支給嗣後於咸豐四年部議令照山西省裁減章程以裕經費經前督臣飭司議減有驛各廳州縣酌留工食十分之二無驛各廳州縣酌留工食十分之四計每年實支銷銀七千四百餘兩共節省銀一萬六千六百餘兩奉 諭旨在於案嗣於同治十一年接准部咨以安徽巡撫具奏鋪兵循舊安設一案他省事同一律飭令體察情形或酌量裁汰仍復舊章等因時值軍需旁午征調紛煩各州縣先已另設民捐夫馬局作爲支應過境兵差及遞文報工食之用經費既充文報亦無貽誤遂以毋庸仍復舊章咨部追復軍務一律肅清並無過往兵差而各廳州縣仍沿舊習接撥捐派夫馬

有較正續加至數倍者所收之項多歸不肖官紳侵漁中飽民情困苦怨嗟故路京控上控之案層見迭出臣到川後廉得其情嚴飭各該驛州縣將向設之夫馬局永遠裁撤不准撥糧攤捐惟自北路放元至西路清溪等十數州縣爲西藏各番及西南二路土司進京朝貢之路酌留夫馬一二成津貼驛費由官親自經理核實報銷概不准派紳設局以杜虛糜綜計每年節省民捐夫馬雜派不下一百數十萬兩歷經奏明在案惟夫馬既裁各州縣頓失利藪於接遞上下公文往往壓擱遲誤雖委員確查照例參處而陋習尙未全革茲據布政使程豫按察使黎培敬查明川省有驛地方計四十一驛州縣惟成都首站及州北八州縣每站額設驛馬三三十四匹尙敷馳遞其東南二路數十驛州縣每縣僅設驛馬數匹及無驛州縣額設鋪司兵工食自咸豐初年裁減之後僅留二成四成各處山路崎嶇道長站遠兵役太少不敷遞送且所領二成四成工食又須遵照部章減平折票該兵役難資糊口文報之不能依限馳遞情實可原由司酌議請將上年所裁鋪兵工食銀兩全行復還舊額照例支發免其減成以資辦公而示體恤實詳請奏前來臣查鋪兵例定工食數本不多咸豐年間復經奏減僅留二成四成部臣雖有仍復舊章之議事未果行近年川省各屬夫馬局業已裁撤節省民財甚多惟鋪兵工食不敷接遞文報實難迅速係屬實情懇 恩勅部核議將咸豐四年所裁鋪司兵工食銀兩復還原額免其減成仍照例扣平支發以

期無誤文報並責成臬司隨時確查倘有不肖官吏私自扣減致缺兵額卽詳揭從嚴參辦以肅郵政下部議奏○諭軍機大臣等左宗棠奏軍餉告匱請有催解一摺據稱光緒五年分西征軍餉各省關欠解銀一百九十餘萬兩本年截至四月分止欠解銀一百十餘萬兩致應調之軍應辦之事均以餉項維艱無從籌措等語新疆善後各事暨採運糧食關內外征防各軍薪糧等項需用浩繁現在籌備防務待餉尤殷著該將軍督撫將五年分欠解西征餉銀無論如何爲難趕緊補解一面將本年新餉陸續提前早解毋得稍事延緩致誤要需○辛未命孫毓汶經查勘 昌西陵隆恩殿等處及 慕陵內務府衙署工程○壬申諭軍機大臣等左宗棠奏現已行抵哈密關外軍務諒經布置周詳現在時事孔艱正須老於兵事之大臣以備朝廷顧問左宗棠著來京陛見一面慎選賢員堪以督辦關外一切事宜者奏明請旨俾資接替此外帶兵各員中有才略過人堪膺鉅秉性忠勇緩急足恃者並著臚列保薦用備任使將此由六百里諭令知之○諭軍機大臣等北洋津海山海二口爲近畿門戶津海已飭李鴻章妥慎防範會國荃久歷戎行聲威素著著督辦山海關防務事宜該撫由山西前赴山海關入京甚近先令來京陛見面授機宜○諭軍機大臣等前因俄國議約不易轉圜固有派兵來華藉端挾制並調撥兵船約入九月間將封遼海之信當經諭令李鴻章等妥慎防範並令會國荃督辦山海關一帶防務事宜以期周密因

思沿海地方遼闊防不勝防非有大枝勁旅居中扼紮相機策應不足壯瀕海之聲援爲京圻之翼衛湖南提督鮑超久歷戎行聲望素著即著於湖南湖北等處選募得力勇丁萬人尅日成軍由該提督統帶乘輪船北上限八月以前駛到此軍到後應於天津山海關兩處適中之地擇要駐紮著李鴻章會同李鮑超會商妥籌奏明辦理鮑超新募之軍應需軍火鎗械等件著李明舉於湖南機器局所存洋鎗洋礮儘數撥給其餘軍火並著酌量調撥以資應用所有該軍起行應需餉項即著李鴻章彭祖賢查明開在部撥邊防經費項下如數支給俾利進行到防後月需餉銀著戶部給籌應用將此由六百里各諭令知之○諭本月二十八日朕親詣皇史宬行禮著先於皇史宬殿內設香案一香爐一香盒一親自拈香行禮毋庸派人遞香御前大臣御前侍衛隨入殿門內跪清門侍衛俱在殿門外至 寶錄館總裁及禮部各員均毋庸隨往○癸酉諭前有旨將崇厚暫免斬監候罪名仍行監禁諭令曾紀澤將應議條約妥慎辦理茲據總理各國事務衙門接到曾紀澤電報現在商辦一切懇爲代奏施恩等語崇厚著加恩即行開釋該衙門知道○予江蘇吳縣孝子原任四川潼州府知府陶文潞旌表○乙亥頒給廣西南甯府城隍廟匾額○丙子諭銘安等奏吉林疆長春疆文童開考分別訊辦飭拿各摺片吉林疆文童承福等於臚官考試點名進場後藉端嚷鬧承福膽敢扯壞龍門鐵鎖與雙喜成林等一齊闖出因衆童並未出

號恐仍屬門考試復商同退回通令全行散考長春鄉文童赫選三等因該總巡試爭挑堂號輒敢聚眾
開堂肆鬧開門出場均屬目無法紀吉林省經設立考棚尤宜首端士習豈容不法之徒任意滋鬧此風
斷不可長永福雙喜成林均著照所擬杖一百流三千里雖係旗人情節較重卽行實發不准折枷以懲
效尤赫選三萬鶴亭程龍榜王竹林王玉麟等著該將軍等飭令地方官按名嚴拿務獲究辦並著曉諭
士子務宜各知自愛嗣後倘有不守場規藉端滋鬧情事卽著照例從重懲辦該部知道○長善張樹聲
等奏廣東同文館前於同治六年十月內因學習三年已有成效經前署將軍慶春會同前兩廣總督瑞
麟等考察肄業諸生擇其文藝堪以造就者咨送六名到京考試經總理各國事務衙門考核均堪造就
奏准作爲繙譯生員監生准其一體鄉試分別派充將軍督撫各衙門繙譯官行令嗣後該省於該學生
等三年學成後卽行奏明分別給予生監並派充繙譯官如有精通西語西文才識出衆者另行送京考
試授以官職等因隨於同治十年三月內同文館已屆三年經奴才長善會同前兩廣總督瑞麟等照章
奏明辦理在案續經奴才等查明各衙門繙譯官係屬有名無實並無差使奏准將繙譯官裁撤在於各
學生中擇其西語優長者數人遇有奴才等接晤洋人時令其來署代傳言語歸於年終考核擇尤備賞
以節糜費嗣於同治十三年兩屆三年期滿經奴才等遵照前後奏定章程辦理亦在案茲同文館學習

外國言語文字又閱三年自應遵照定章將學成諸生認真考試因思奴才等於漢文頗知優劣而於西語西文毫不通曉當經飭據西教習三順在各學生內擇其平日好學於西語西文較能通曉者開列十一名呈送前來奴才等公同當堂面試先以漢語令繕西文繼以西語令繕漢文考得正藍旗漢軍孔慶高等四名漢文尚屬平通據西教習三順評閱西文亦無大謬均堪造就理合奏明請將孔慶高楊福各給繕譯生員蘇顯揚給予監生至王堃元一名係屬附生廣東同文館並無辦過獎勵附生成案奴才等公同商酌援照總理衙門奏獎上海附生章程擬請將王堃元作為附貢生准其一體鄉試仍飭令在館學習務期深粹其餘學生按其優劣分別去留以昭激勸得 旨孔慶高等均著照所請獎勵該衙門知道○何璟等奏查明福州省城及外屬被水情形現已照常無庸調劑撫恤得 旨被水地方選徙人口如有應加撫恤之處仍著酌度辦理○丁丑諭軍機大臣等所事府左庶子張之洞奏贛陳應防禦地事宜開單呈覽所稱江防應專派重臣督辦宜令彭玉麟親駐吳淞江陰等處及早籌備一條自係為扼要設防起見彭玉麟能否專駐各該處籌辦即著酌度具奏○戊寅 上詣 慈寧宮行禮○予故直隸提督郭松林妻趙氏旌表節烈○追予安徽殉難知縣張翼等祭葬建祠○庚辰諭前因時事艱難迭經諭令軍機大臣隨時匡弼力戒因循乃近來該大臣等辦事遲延實難辭咎著交各該衙門議處○岐元等

奏奴才等因辦理圍場地畝丈量完竣請設官添兵並議善後事宜奏經各部逐條會議擬奉 旨依議欽此欽遵咨會前來奴才等查部議核准各條自應遵照辦理惟添設圍場總管一缺原奏作為滿蒙漢公缺請加副都統銜支食二品俸銀現准部議以各省駐防總管員缺俱以滿洲蒙古分用應作為滿蒙公缺請加副都統銜品級較崇可否 賞加恭候 欽定請支食二品俸銀核與同治十一年奏定章程不符亦未便兼充練軍翼長又添設通判巡檢等官應支廩俸役食兵房馬撥建設城署及歲修墾墾工程銀兩均令按照折扣章程支放在部臣慎重官階節省經費固應限以成例但奉省自開辦邊務以來均係隨時奏明最為變通實事求是所以奴才等酌設圍場事宜仍按照東邊奏定章程辦理若復繩以舊制勢必諸多掣肘此奴才不得不將實在情形據實稟請者也查圍場升科之地南與東邊毗連北接吉林圍界地處邊陲流民甫經向化總管一缺有督徵租賦巡護圍山訓練兵丁之責必須量材器使因地擇人原與各省駐防總管不同滿蒙雖屬有才參以漢軍則遴選較廣庶可得人而理惟既任以邊疆繁劇之區尤宜稍崇體制量加體恤合無仰懇 恩施賞加副都統銜准其照銜支食二品廩俸俾控調有權而廉隔自飭其兼充翼長一節經戶部核議與各省領道兼充翼長成案不符第圍場之兵非歸總管統率訓練難期整肅既未便增添翼長擬請將該總管兼充練兵統帶官所有調練各城之兵統歸

該總管布駐紮營飭操演以專責成此總管一缺應請仍作為滿蒙漢公缺並請加副都統銜支食二品俸銀兼充練兵統帶官之實在情形也至各官廉俸辦公役食馬撥兵房城營工程壞堆歲修各銀兩前係按照東邊原案章程核實議奏均係減辦可減況邊地情形苦累非奉省內地可比再行折扣勢必辦公無資轉生弊竇查光緒三年東邊各官廉俸辦公役食及一切工程部議令按折扣章程支給嗣於光緒四年經前督將軍崇厚等以邊外地方瘠苦事屬創辦請照原奏概給實銀於四年三月十九日奉旨允准在案此次圍場設官分治與東邊新設廳地本屬相連事同一律自應懇 恩概發實銀毋庸折扣免致辦公竭蹶此各官廉俸辦公役食馬撥兵房及各項工程銀兩應請支給實銀之實在情形也此外總管佐領巡圍津貼執儀工食統帶應領薪水夫馬工食旗員隨缺官地折租與廉俸役食無異通在一分耗羨項下支給未便兩歧應請仍照原定銀數均發實銀以示體恤至於輪派坐卡官兵多係邊道道員調各營地處偏僻食物暫無原有俸餉不敷養贍亦請仍照原奏官一員每月酌加銀十兩兵一名每月加給銀二兩以資防守總之圍場自光緒四年奏請開辦派委員查丈地畝照東邊章程一律升科徵收押荒並仰體 皇仁免追從前花利流民藉以生活惟邊荒初闢良莠不齊亟應設官添兵撫綏彈壓以為經久之計若再限以舊章不能因時變通勢必窒礙難行事無實濟奴才等籌度再四惟有將一

切實情形據實陳仰懇 天恩俯念邊地緊要按照奴才等此次覆奏均請 特旨允准以便隨時興辦實於地方大有裨益況以該處所出即供該處所需並非另籌款項亦與東邊原案章程相符得旨園場設官添兵等事係屬創始該將軍等所奏自為因時制宜起見均著照所議辦理惟當認真經理毋致日久視為具文○辛巳諭戶部奏遵議烏拉崑崇阿所交左翼監督盈餘銀兩一摺所交盈餘銀一千七百八十七兩零著交廣儲司烏拉崑崇阿短收額內盈餘銀兩應得處分著加恩寬免○壬午諭戶部奏遵議文秀所交右翼監督盈餘銀兩一摺所交盈餘銀二千十八兩零著交廣儲司餘依議○諭御史文鏞奏內閣會議事件請飭妥定章程等語著該衙門議奏○癸未 上詣 奉先殿 壽皇殿行禮○予山西忻州孝女趙蓮旌表○甲申諭前據岑毓英奏貴州安義鎮總兵周壽昌久未到任當經諭令李鴻章查明該總兵能否赴任即行具奏茲據奏稱周壽昌現在江南管帶防營一時乏人接替等語周壽昌著准其暫緩赴任所有安義鎮業務仍著岑毓英派員署理○諭此次遠賴喇嘛坐牀除業經頒給勅書賞件外著丁寶楨於司庫內提銀一萬兩派員送至西藏交色楞額給領○乙酉銘安等奏戶部贖陳十條內除關稅為吉省所無停止不急工程核實預撥兩庫折價應由戶部分別核辦捐收票本應由兩江總督酌議外如原奏贖銀荒一條查吉省地闊官少稽查難周各處閒荒牛腴流民私墾奴才銘

安前議四條內卽以墾荒爲第一要務近因賊氛稍斂業經檄派委員分路查勘前後查出馬延河阿克敦城柳樹河南岡等處浮多地畝飭令逐段清丈照章開辦惟從前開放之地辦理未善弊竇叢生前已附片具陳在案現在奏調直隸候補道顧燠熙業經抵吉已派總司荒地局務會同本省旗民委員查明各處荒地已未升科若干畝無論曾否報部均令澈底清查造具地畝確數佃戶花名分別奏咨立案從前未報升科各地有無私墾匿報墾多報少之處嚴飭查勘妥爲經理俾無曠土而輯流民又原奏整頓釐金一條查吉省自咸豐七年舉辦日釐捐向由衆商約數包納每年統計可捐錢九萬餘千嗣因馬賊頻年滋擾商賈蕭條以致遞虧原額奴才等體察情形遵經奏明變通辦理將所屬各處鋪商日捐概行停止改抽貨釐通省每年約計共收錢二十四萬餘千較從前原定之額增至一倍有餘較近年收捐之數增至數倍不止所有收捐此項並未設立專局向由地方官管理其經徵升役等工食照奏定章程開支一成公費此外並無別項開銷卽省城設立煙酒木稅總局委員不過數人巡役亦僅數差遣本年春間奏明於岔路河雙得河分設卡局所以嚴稽查而防繞越若裁撤歸併所省薪水無幾偷漏必多於稅課大有妨礙又原奏嚴查交代一條查吉省地處邊疆吏治久廢各屬交代從未認真盤查向係通融提報以致款項轉摺不清奴才等奏請設局清查查出吉林廳虧短稅課銀三萬餘兩前已據案奏懇 天

恩寬其既往各歸各任勒限追賠如蒙 俞允卽當趕緊督飭局員將虧欠數目分別劃清勒定期再行奏明辦理經此次清查之後自當遵照戶部奏定章程按照例限不准再行宕延倘仍如前侵挪含混結報卽行據實嚴參並將各屬任卸日期分報戶部以憑考核又原奏嚴核奏銷一條查各省各屬如四年分應徵地丁雜稅等項銀錢定限五年十月內徵解全完抵充是年俸餉至六年始行題報核銷歷經遵辦在案惟近因吉林屬歷任於經徵稅款未能解清是以題報稍稽奴才等已於清查交代摺內奏請核明數目勒限嚴追以期歸款有著茲奉戶部定章錢糧奏銷一面具題一面將未完職名開單專摺奏報由部核定處分先行覆奏自應遵照辦理當卽通飭各屬迅將未完錢糧稅款趕緊掃數徵解以重款項而顧考成主原奏專提減成減平銀兩二條查各省按年應放俸餉雜支減平並養廉減成等項銀兩均各照章抵充次年俸餉近因庫款支絀辦理核銷之時不敷應用復將減扣銀兩列抵現年俸餉應請仍照舊章辦理以上各款奴才等均於未奉 諭旨之先悉心籌畫次第舉行方今時事艱難庫儲匱乏亟思就地興利以本地之所籌供本地之所用奴才鈺安到任後正值賊氛肆擾選將練兵先將馬賊撲滅俾商民各安生業隨卽督飭委員改抽釐捐勘放荒地勸辦斗稅刻下均已漸有成效惟吉林地瘠天寒物產不豐商民疲敝松花一江不通海舶既無船稅可收又無鹽課可辦較之奉化尤爲枯窘下戶卽

知之○蘇勒布奏朝鮮解送遇風難民遵照成案辦理據鳳凰城城守尉花翎副都統銜記名副都統宗室興麟遞到朝鮮國王咨文內開六年二月初十日酉時買賣標船一隻漂到本國聞該船載差該地方官洪大車馳赴船泊處問情詳請來山察其言語服著是 上國人漂到無疑詢係山東登州府文登縣人孫沛澤孫作雲王三王六王七戚仁邵八苗彩徐增王玉等乘船捕魚猝遭大風漂至全羅道靈光郡地方經本國妥為收留厚致館廩優給衣糧山旱路粿差驛學李應若管押送回鳳凰城合行移咨請照驗轉 奏施行前來奴才詳查道光二十年曾經朝鮮送到遇風難民交鳳凰城轉解其差官 獎賞經禮部奏准 賞給該國差官銀三十兩由 盛京戶部咨領頒發歷經遵辦在案此次該國差官李應若解送遇風難民孫沛澤等十人已據鳳凰城城守尉轉解 盛京將軍衙門訊明情節相符遞回原籍其該國差官請照以前奏 准辦過成案 賞給銀三十兩由庫支領頒發以示優恤允之○丙戌周德潤奏安民以察吏為先而屬吏之貪廉視大吏之奢儉為轉移我 世宗憲皇帝酌提耗羨釐定養廉所以懲賁而示之儉者意至深也本年直隸江浙廣東福建等省時有水旱冰雹偏災迭奉 明詔賑恤天恩實優且渥矣然臣竊謂治民之道如治病然有災而恤之治其標也無事而撫之治其本也昔漢文帝躬行節儉為天下先故西漢循吏為多而百姓日臻富庶近今外官習尚浮華支用日苛不給大吏則

取於州縣州縣則取於閭閻而借名加派之事往往而有臣風聞奢侈貪婪之習以廣東官場爲最其上
司溺情貨利惟賄是求其屬員竭力應酬疲於奔命每委一缺派一差皆須鑽謀於前而又供應於後是
以無事者終年坐困有事者虧空尤多以州縣而論自將軍以至道府應送規禮七分以每年節壽合計
應送規禮三十五分每次一分如金玉珠寶綢緞鐘表之類價值七八千金門包約數白金雖厚薄不能
強同大概以尊卑爲等殺而暗昧之苞苴尙不在此數縱屬優缺亦精疲力盡矣卽如廣州府屬之六大
州縣每年進項均在十萬金內外迺入不敷出計卸事之後又必明虧國帑贖負私債不能不取償於
民而民之生計日艱民之風俗日壞是以衙署之旁公然聚賭省垣之內白晝搶劫一遇荒年其害有不
可勝言者前劉坤一任總督時謹操守絕餽賂屬僚亦漸知自愛惟流弊已二十年積重未能驟返新任
總督張樹聲巡撫裕寬蒞任伊始正屬員窺探意旨巧爲嘗試之時擬請嚴飭該督撫砥礪廉隅以爲
之倡凡貪黷者立卽參劾清苦者量與升遷亦漸可轉移其風氣至積弊相沿他省恐亦不免可否通
諭疆吏整躬率屬共勵清操上諭沈馬周德潤奏近今外官習尙浮華廣東尤甚派差委缺競爭鑽營
州縣致送上司規禮習爲故常上虧國帑下朘民生流弊多年積重難返他省恐亦不免請飭各該督撫
認真禁革等語各省吏治全在封疆大吏潔己率屬崇實黜浮盡心民事以期地方日有起色前迭次諭

令各督撫嚴革陋規效據詢洗馬所奏廣東積習情形殊於吏治大有關係著張樹聲裕寬破除情面嚴行禁革考察屬員賢否分別舉劾並著各省督撫檄遵前旨廉隅自勵察吏安民用副朝廷孜孜求治至意○戊子諭何璟等奏剿除漏網匪徒一摺福建臺灣府匪徒劉參根以漏網餘孽潛匿多年輒又糾眾滋擾本年五月間經臺灣鎮總兵吳光亮等派兵往捕膽敢率眾抗拒各兵勇奮力合剿拿獲正法餘匪一律殄除辦理尙爲妥速所有在事出力各員准其擇尤保獎毋許冒濫○己丑諭孫貽經奏遵查專案工程請派員興修一摺所有 慧愍固倫公主 慧安和碩公主園寢饗堂等工著派本年承修另案工程之大臣徐桐師曾敬勳承修○劉長佑等奏 臣等於光緒四年因巴蠻混過金沙江擾及永善縣境當飭防軍就地擊捕又於是年八月至五年二月派員督軍擊捕臨安夷匪查辦納樓土目及剿除開化安平匪徒五年閏三月派員查勘騰越邊界擒獲在逃首逆安撫土夷又於是年十一十二兩月因通東尋甸州屬教匪滋擾調派兵團就地擊散擒斬首要保衛州城所有在事出力官紳員弁經 臣等先後奏奉諭旨准其擇尤彙奏請獎在案 臣等查蠻眾土夷犷悍成性往往伺隙竊發狡焉思逞其內地游民之無賴者或勾結同盟或傳習異教各召徒黨千百爲羣竟敢焚掠鄉堡窺伺城垣猝不及防變殊叵測茲幸仰仗 天威次第殄滅首要各逆後先伏誅誠足伸 天討而快人心其在事各員迅赴戎機力摧逆

績勞勩有足多者臣等覆加查核量爲等差於慎重名器之中仍示鼓勵人材之意得旨劉有志等均著照所請獎勵內尹光祥並賞給靖勇巴圖魯名號鄧光猷著賞給冠勇巴圖魯名號刁盈庭著賞給剛勇巴圖魯名號許繼衡並賞給莫爾廣額巴圖魯名號餘依議該部知道○辛卯命徐桐興廉告祭慕東陵○甲午上詣皇史宬行禮○命桂祥署烏里雅蘇臺參贊大臣額爾慶額署科布多幫辦大臣○予伊犁各城陣亡驍騎校格連德等祭葬世職○丙申予山東陣亡提督郝上庠於原籍直隸建祠○是月美利堅國新簡駐華使臣安吉立抵任

八月丁酉朔諭張樹聲等奏遵有察看知府據實覆奏一摺廣西平樂府知府吳德泰在任經年輿情未洽著以通判降補餘著照所議辦理該部知道○戊戌吳元炳奏揚州府城遭風被災撫恤情形得旨覽奏已悉卽著督飭地方官將被災窮民妥爲撫恤毋任失所○吳元炳奏江蘇請暫停道府屬州縣分發三年九之○庚子廣東按察使張銑休致○予安徽合肥縣節孝婦吳劉氏旌表○辛丑諭張樹聲等奏特參查辦聚匪謬妄欺飾之文武各官一摺廣東崖州等屬民聚雜處該地方文武宜如何妥爲撫馭俾得相安乃本年三月間署崖州協副將李其昌署崖州知州李宗光擅派外委陳志泰前赴聚剿索取陋規致陳志泰被戕並不立時稟報輒藉聚匪糾搶一案朦混飾稟又復捏詞謾過實屬貪劣謬妄任意

欺飾李其昌李宗光均著卽行革職由張樹聲等提省嚴訊確情按律懲辦餘著照所議辦理該部知道
○以倪文蔚爲廣東按察使○壬寅諭前因御史朱以增奏順天直隸所屬王莊請遇災酌減分數並佃
租歸官徵解等語當諭令順天府尹直隸總督奏明辦理茲據李鴻章奏稱順天直隸各屬王員勒等
府莊田坐落五十餘州縣之多若由地方官代爲徵租則地畝必須逐一清楚徒滋紛擾事屬窒礙難行
等語所奏亦係實在情形所有王公員勒等府坐落附近京畿州縣莊田仍舊循照舊章辦理至遇有災
歉應如何減收租數之處由各該王府等自行的辦○癸卯調錢寶廉爲吏部右侍郎孫詒經爲刑部左
侍郎以孫家鼐爲工部左侍郎○江蘇學政夏同善卒予祭葬賞其子主事敦復舉人○甲辰諭總理各
國事務衙門王大臣等俄事日迫能照前旨爭重疆圉妙否則就彼不强中國概允一語力爭幾條卽
爲轉圜地步總以在俄定議爲要俄有成說由電請旨遵行○鮑超奏欽奉 諭旨選募勇丁遵卽與撫
臣李明墀商議招募務期兵餉歸於實用以節糜費一面飛飭川鄂諸將剋期前往武漢齊集查臣督部
員弁前經遣散者遠近不一川省惟成都較遠已咨商四川督臣丁寶楨酌量發給川資飭令飛速到鄂
等候派用凡行師之道練兵必先練將而精選擇用內不避親外不避仇自宜正己化人破除情面認真
公事將中選將以期無負 陛辭時 皇太后 皇上明切誥誡之至意臣現在湘省招募十五營其餘

八營赴鄂招募俟統帶營哨各官派定齊全飭其一面選募勇丁臣於十日之外迅往湖北精為揀擇總期速而又速剋日赴津上慰宸衷臣自審調諸將慎選其才數日以來夜不成寐所慮者俄人陰謀詭計蓄志已久倘或竊動必挾全力而來十萬八萬意中事也臣再四思維兵力稍單恐未能一時釐事則曠日持久糜費更鉅擬請再添十營除親兵三營外共三十營以符當日選軍步隊之數每路十營陣列三才臣帶親兵三營督隊退者立斬賊勢將敗馬隊由夾縫中突出衝亂賊隊得以五路截殺大挫其鋒庶足張聲威而資調遣惟臣舊部記名提督通永鎮總兵唐仁廉記名提督正定鎮總兵婁雲慶該二員勇略素著實為選軍不可多得之員可否請旨飭下直隸督臣李鴻章轉飭該二員按照選軍章程數目就近各招五營俟臣到津歸併調遣該二員印務即由直隸督臣另委妥員署理又臣所部選軍向有馬隊二千名可否仍照舊章如數添設庶馬步相輔而行更為完善現值口馬八月十五日出槽請旨飭下直隸督臣派員採購馬匹鞍轡由臣據派統帶營哨各官是否有當伏候聖裁至遵旨選募萬人正與湘淮兩軍每營五百人合計十營之數相符今臣按照選軍章程仍招募二十營外親兵三營每營六百人以便分佈為數稍鉅合併聲明上諭軍機大臣等前有旨令鮑超於湖南湖北省招募萬人剋期成軍北上該提督現在湖南招募十五營俟赴湖北再招募八營共計二十三營是於二十營之外

已添親軍三營且靈車舊制又係六百人爲一營計一萬三千八百人已逾萬人之數兵力不爲不厚該提督尙擬再添十營令李鴻章轉飭唐仁廉襄雲慶就近各招五營歸併調遣爲數過鉅現在餉需竭蹶支應較難所請著毋庸議該提督當將現在所募二十三營揀擇成軍統帶北上以期得力李明墀已將在湘起行餉需籌給鮑超此時計早抵鄂招募完竣應需軍餉著李瀚章彭祖賢妥速應付並飭招商局整備輪船駛送僅令該提督尙期督率前進毋稍耽誤該軍需用軍械據李明墀奏洋鎗洋礮俱向鄂中採辦添補火藥一項先向津局取用隨後解還著李鴻章酌量撥給至鮑超所稱蹇車向有馬隊三千名可否仍照舊章如數添設著在原募二十三營內酌量改設毋庸添募其應用馬匹鞍轡著李鴻章派員採購以備乘騎○李瑛奏近來各省督撫凡遇奏參之案與外參之款往往就延年月希圖避重就輕化有於無巧爲開脫其人地步所以然者平日瞻顧情面視屬員爲世故周旋一旦有事不能不爲之徇庇而屬員亦恃此以侵漁百姓殘害地方每一莅任以饋送上司爲急務其奉公守法潔己事上者百無一二身家重而民命輕甚且急而公事緩積習皆然幾於各省一轍如山西永濟縣知縣洪貞頤以經徵錢糧收多報寡被參革職事在光緒五年二月間至六年七月二十二日見諸邸抄該撫奏請開復相距一年過半始經審明確情夫以收多報少之件該縣所司何事乃不能卽行聲明據情上達而遲至半年始

云賠繳雖保無已吞復吐之情其間鉤營賄囑之處雖不可知而時日既久何術不能施也近年各省遇有奏參之案往往故意遲延巧爲開釋如此殊不知此一貪縱之官累及地方之民范仲淹所謂一家哭何如一路哭也夫刻薄其民而徵求無度與該守自盜而傾吐於後其害民等耳應請 飭下各該督撫嗣後凡遇被參之案勒限半年務得實情奏報毋輕爲開脫以長無恥之習毋過爲徇庇以受屬吏之蒙實事求是公而忘私自能不蔽於明不蔽於遠矣總之於有弊中求無弊其弊滋多於不法中求守法其法益壞今日吏治之不能澄清皆由此也 上諭御史李瑛奏各省奉查案件耽延滋弊請飭勒限半年奏結一摺各省督撫遇有奏參屬員之案奉旨飭查自應迅速辦結若如所奏瞻顧情面徇庇屬員往往故意遲延巧爲開釋殊屬有負委任嗣後此等案件該督撫務當迅速辦理奏明結案毋得稍涉遲延致滋弊竇將此通諭知之○乙巳恆訓丁寶楨奏據峨邊營參將倪人元峨邊廳通判楊銘稟稱本年四月二十一日有馬邊烏拋夷匪百餘人竄至廳屬鹿子溝杉林間燒燬房屋劫掠漢民男婦並牲畜衣物多件殺傷張壽濟田大倫並女孩三口又於二十九日五月初三等日潛竄大香鎮麻池陶一帶擄掠男婦數十餘人殺傷三人燒燬民房數十間已派鎮遠營哨弁吳國昇外委戴占彪趙得勝各帶兵勇分路堵剿請派撥勁勇前往會同剿辦等情前來臣等查該夷匪等敢於糾眾出巢肆行擄掠焚殺情殊頑梗惟

其性情反覆無常非示之以兵威不足以資震懾當派管帶泰安右營副將林護文代理武字副前營總兵唐珊峯各帶所部勇丁馳往峨邊會同該廳營文武查看情形妥籌剿捕務將爲首搶擄之兇夷嚴拏懲辦俾畏威帖服並飭將擄去之難民牲畜各件一律繳出清還給屬領回宗聚再行妥爲撫綏庶幾知懼知感免致時形反側惟據該廳營文武稟稱此次出巢之夷係馬邊烏拋夷匪殊屬含混查馬邊夷支出巢竄至該廳境內必由峨邊夷地經過峨邊夷人如果毫無妄爲何以不行攔阻致令竄越是此次夷匪即使果係馬邊夷匪亦必峨夷勾結所致顯然可見今該廳營文武具稟情形難保非本廳夷人搶掠之後藉名馬邊意圖嫁禍抑恐廳營文武有希冀推諉卸過情事必須確切查明辦理以免兩地夷人挾嫌生心別滋事端而亦可以儆地方官遇事諉卸之弊等現飭委員確切查明據實稟辦仍一面飛行馬邊廳轉飭該營土千百戶等一併確查該廳烏拋夷支果否糾衆出巢不准稍涉朦混並卽嚴飭認真約束該夷毋得出外滋事自干誅戮得 旨著卽飭令派出之員確切查明並令馬邊廳轉飭該營土司一併確查認真究辦毋任稍涉朦混○盛京禮部侍郎蘇勒布因病乞休允之○丙午 上詣 奉先殿壽皇殿行禮○調松森爲 盛京禮部侍郎轉桂全爲禮部左侍郎以崇禮爲禮部右侍郎○戊申鮑超奏 於七月二十四日將遊 旨招募大概情形奏明在案當卽密調各路舊部諸將陸續來湘精選

齊備於七月二十六七等日分別札派統帶營哨各官於八月初三日領齊小口糧分途招募一十五營外添募一營共十六營諭令揀選精壯勇丁勤加訓練格遵紀律所過秋毫無犯臨敵奮勇爭先以成勤勞上慰宸廑所有鑼鍋帳房鉞鏑斧鋤旗幟刀矛等件已由撫臣李明墀分令趕辦至於步隊所需洋鎗中外所造之後門丁字自來火開放雖屬快利不能耐久且子難合腔諸多不便即洋人用以臨敵數次亦必更換臣前過天津所見操防淮軍均用英德兩國矛頭洋鎗因其輕靈穩妥以便打響操演現由湖南機器局儘數撥給前門上藥洋鎗六百四十桿外尚需六千二百六十桿及營哨各官之馬鎗三百桿前已飛商湖廣督臣李瀚章湖北撫臣彭祖賢迅速密飭德國商人將前門上藥矛頭洋鎗如數趕辦以應急需其運軍糧餉餉章係臣與前湖北撫臣胡林翼酌定原與湘淮各軍有別已將詳細數目另行備文咨覆湘鄂兩省督撫臣轉覆戶部備案至湘省新募各營之小口糧臣與撫臣李明墀及藩司崇福面商每名每日給錢八十文以二十日為度作為招募之資俟臣由湘赴鄂點名成軍後再發給大糧月餉以節中途糜費所需各營大餉仍與撫臣李明墀藩司崇福籌商因此新募之師須於湖北齊軍操練先後乘坐輪船稍需時日必多支給且天氣漸寒征途甚遠兵勇須添置寒衣寬備行糧如能籌辦三月之餉則到防或不至於掣肘現在實因湘省庫款支絀儘力竭湊允給兩月臣責成統帶官記名提督熊

鐵生鄧訓誥向世珍等三員出具各該員本質關防印結承領後迅將各營率往湖北臣隨帶總理營務處頭品頂戴記名提督申道發等於八月初十日先行馳赴鄂省與督撫臣商辦精選招募事宜 上諭軍機大臣等前據鮑超奏選募勇丁情形當經諭令李瀚章等將應需軍餉妥速應付整備輪船催令該提督克期督率前進現在事機緊急亟宜厚集兵力以固藩籬鮑超已在湖南招募十五營其餘八營赴鄂選募此時計早行抵湖北添募成軍著李瀚章彭祖賢速將該軍應用餉項籌齊給發一面飭令招商局整備輪船駛送如船隻不敷裝運卽著該提督統帶十數營先行起程限於八月內到防其餘各營卽由該提督責成派出將領統帶約束陸續北來不准稍有遲誤並著劉坤一酌調福建官局輪船及招商局輪船趕緊馳赴漢口運載此軍以期迅捷○已酉諭昨午門值班官兵有毆打太監以致遺失齋送物件情事本日據岳林奏太監不服攔阻與兵丁互相口角請將兵丁交部審辦並自請議處一摺所奏情節不符禁門重地原應嚴密盤查若太監齋送物件並不詳細問明輒行毆打亦屬不成事體著總管內務府大臣會同刑部提集護軍玉林等嚴行審辦護軍統領岳林章京隆昌司鑰長立祥著一併先行交部議處○庚戌諭軍機大臣等李鴻章奏塞外馬匹必須夏令采購現已八月中旬賣者次第收場勢難零星搜索擬請於察哈爾牧羣學生官馬內趕緊選撥並擬派記名提督楊安典馳往口外會同揀擇

等語鮑超招練馬隊尅日到防需用馬匹甚亟著祥亨分飭商都太僕寺各總管卽於該處牧羣內孳生
官馬項下不必分定成數迅速挑選能戰驢馬三千匹會同楊安典采擇不得以口老瘦瘦充數卽由楊
安典分起派弁押送進口撥給靈車應用毋稍延緩○李鴻章奏用兵之道必以神速爲貴是以泰西各
國於講求鎗礮之外水路則有快輪船陸路則有火輪車以此用兵飛行絕跡而數萬里海洋欲通軍信
則又有電報之法於是利則以玉帛相親戰則以兵戎相見海國如戶庭焉近來俄羅斯日本國均效而
行之故由各國以至上海莫不設立電報瞬息之間可以互相問答獨中國文書尙恃驛遞雖日行六百
里加緊亦已遲速懸殊查俄國海綫可達上海早綫可達恰克圖其消息靈捷極矣卽如曾紀澤由俄國
電報到上海祇須一日而由上海至京城現係輪船附寄尙須六七日到京如遇海道不通山驛必以十
日爲期是上海至京僅二千數百里較之俄國至上海消息反遲十倍儼過用兵之際彼等外國軍信速
於中國利害已判若徑庭且其鐵甲等項兵船在海洋日行千餘里勢必聲東擊西莫可測度全賴軍報
神速相機調援是電報實爲防務必需之物同治十三年日本窺犯臺灣沈葆楨等屢言其利奉 旨飭
辦而因循迄無成就上年曾於大沽北塘海口礮臺試設電報以達天津號令各營頃刻響應從前傳
遞電信猶用洋字必待編譯而知今已改用華文較前更便如傳秘密要事另立暗號卽經理電綫者亦

不能知斷無漏泄之慮現自北洋以至南洋調兵饋餉在在俱關緊要亟宜設立電報以通氣脈如安置海綫經費過多且易蝕壞如由天津陸路循運河以至江北越長江山鎮江達上海安置旱綫即與外國通中國之電綫相接需費不過十數萬兩一半年可以告成約計止綫又橫互須有三千餘里沿路分設局棧常年用費頗繁擬由臣先於軍餉內酌籌墊辦俟辦成後仿照輪船招商章程擇公正商董招股集資俾令分年繳還本銀嗣後即由官督商辦聽其自取信資以充經費並由臣設立電報學堂雇用洋人教習中國學生自行經理庶幾權自我操持久不做如蒙 俞允應請飭下兩江總督江蘇巡撫山東巡撫漕河總督轉行經過地方官一體照料保護勿使損壞臣為防務緊要反覆籌思所請南北洋設立電報實屬有利無弊用敢縷陳 上諭軍機大臣等李鴻章奏請設南北洋電報情形現在籌辦防務南北洋必須消息靈通以期無誤事機該大臣請於陸路由天津至江北鎮江達上海安置電綫係為因時制宜起見即著妥速籌辦並著江蘇山東各督撫飭令地方官一體照料保護勿任損壞餘均照所議辦理○諭軍機大臣等曾國荃行抵保定省城遵旨先赴防所一摺該撫起程後感受暑熱舊疾復發朝廷殊深慮系擬卹劉鴻年一軍自包頭啟程須八月底方抵昌平州擬與曾台前進為日未免過遲現在事機緊要亟須該撫前往山海關一帶妥籌防守昨據李鴻章奏報劉維楨一軍已於八月初六駛抵山海

關暫紮附近威遠城一帶著卽督率親兵三營馳往該處先行相度地勢斟酌布置該撫素抱公忠涼必能妥速籌辦以副委任○癸丑頒給河南商邱縣湯陰縣 城隍廟 關帝廟匾額○甲寅命候補主事陳昌前湖北監利縣知縣黎埤赴鮑超軍營遺差○諭軍機大臣等前因事機緊迫諭令鮑超統帶十數營先行起程限八月到防並令劉坤一酌調福建官局輪船及招商局輪船馳赴漢口運載鮑超接奉前旨卽卽趕緊起行第恐輪船不多往返裝載未免稽遲著該提督會商李瀚章彭祖賢速卽調集船隻先行統帶十餘營尅日北來其餘各營如何設法陸續起程並著妥籌辦理總期迅速到防毋稍延緩○馮譽驥奏 臣前准護撫 臣王恩沂移交光緒六年二月初六日准戶部咨奏陳時事艱難亟應籌備餉需一摺奉 旨通飭各直省欽遵辦理在案查原摺陳十條內停止工程核實折價捐收兩淮票本三條應由戶部及兩江辦理外如嚴催墾荒一條原奏內開山陝被旱民多流亡該處荒田亦應力爲墾闢等語伏查陝省共額賦田三十萬五千九百六十四頃零額徵起存連閩共銀一百六十二萬餘兩除將營田四千一百二頃零劃開另辦俟開辦後再行附片具奏外共計民田三十萬一千八百六十二頃零自同治元年軍興後人民離散田地荒蕪雖迭經飭令開墾無如逆匪竄擾廓定農民作輟相循旋墾旋棄十一年後腹地肅清農民安業漸次開墾至光緒元二年約收九成有奇三四年旱災合兩年所收僅及八

成有奇五年轉歉爲豐別荒微熟約收十成之七去冬經前護撫臣通飭各屬趕緊招墾今春分路委員會同地方官先行核實勘丈有全境已無荒田者有尙荒一二成至四五成者核計通省現在荒田約有十成之三緣以兵燹之後連歲大歉轉徙流離民窮財竭是以急於闢口而緩於耕作現又示以辦法嚴定章程籌給資本寬限升科其各屬情形不同准其因地制宜妥爲經理務使野無曠土賦不虛懸期復舊額至紳富把持州縣隱匿細加訪察尙無此等情弊有卽照例參辦決不稍事寬容陝省之墾荒如此又溢解關稅一條查陝省潼商道經徵商稅及三元縣歸併銀兩額徵解銀一萬七千九百七十四兩零按年清解自同治元年以後始因兵燹繼以旱災商販既少來源本地無多銷路迭經奏請停徵試辦展緩有案光緒三年經前撫臣譚鍾麟奏請勿拘年限儘徵儘解旋奉部咨今自四年三月起再行予限三年奏請復額扣至七年三月限滿查該道五年徵收數尙不滿二千仍多缺額限滿能否復舊尙難逆料勢難責其額外溢解陝省之關稅又如此又整頓釐金一條查陝省扣釐自咸豐八年起截至光緒四
年止節年收支由局造銷有案局用一切向係照章實支實銷在報銷摺內作正開除並不另收辦公經費核計不及部定一成之數尙屬撙節至各釐卡均係擇要設立並無零星分卡亦無冗員濫役無從裁汰洋藥從前照甘肅章程抽收每百斤入境落地兩次抽釐銀四十兩統隨自貨釐金造報五年准臣左

宗業通行停止現抽收只百貨一項鹽釐收數無多向隨百貨統收至抽收釐數光緒元二年收至三十餘萬兩三年尙收二十餘萬兩四年則不及二十餘萬矣推原其故固由旱災以後商賈稀少亦半因子口稅單侵佔所致現惟督飭各局司員加意稽查偷漏如所報有不實不盡卽予參辦以杜中飽務使多收一分之釐卽可多佐一分之餉陝省之釐金又如此又嚴查交代一條查陝省承平時州縣交代無甚弊囑自軍興後州縣辦防辦剿供億浩繁款目糾纏迄難清結前撫臣邵亨豫飭司立局截以十三年以前爲舊案共計四百七十餘起奏請寬免遲延處分勒限一律算結元年後爲新案依限結報不准逾延並按半年分晰已未完結奏報在案此後各州縣均以處分恭嚴遇有交卸正款尙各趕爲清理惟難攤兩項間有延欠之員本年臣蒞任後規復輪委舊制曾經定章聲明交代未清人員扣委扣補並停差使仍予查參追辦正與部章相符此則陝省所辦交代也又嚴核奏銷一案查陝省每年入款惟地丁爲大宗雜稅次之承平時偶遇偏災尙須鄰省協濟近因兵災相繼賴仍民間元氣過虧徵收復額不易而非常年例支之款如塔城及陝甘征防軍餉軍火製造每年非數十萬金不可而三四兩年賑案尙不在內節年庫款支絀非挹彼注茲移緩就急若拘泥某款動支某項不惟遇事掣肘勢必貽誤要需光緒二年經前撫臣譚鍾麟奏准陝省司庫銷案自元年起每年照實收實支數目開單奏銷一次並按款造冊送

部核銷遵行在案是陝省銷案刻難依限循例造報至各屬徵解有旬月季報可查一有成數延置不解立即委提查有虧挪亦即從嚴參辦不能因奏銷尚未復餉即寬州縣虧挪之咎統俟奏銷復餉如有未完之員核明分數先行開單奏報以昭慎重此則陝省所辦奏銷也又催提減成減平兩款查陝省文武養廉內減成及一切放款之減平均遵照部章核扣只以每年入不敷出故減成減平之款不待積有成數已隨時挪墊他款急需之用仍有不敷尙須預提次年丁銀支銷以資周轉有節年銷冊可考是此項銀兩實無分毫存留應俟關外事務凱撤庫款復餉即當照章解部斷不敢藉詞截留此又陝省減成減平之兩項也下戶部知之○諭軍機大臣等前據曾國荃奏報行抵保定省城當諭令速赴山海關一帶先行相度布置現在事機甚緊該撫究已行抵何處著即督帶親兵迅速馳赴山海關先就現有兵力妥籌防守一面嚴催劉鴻年一軍速赴防所毋稍遲延宋慶一軍現分紮金州蓋平等處是否扼要即由該撫主持調度營口地方緊要兵力尙單本日已諭令岐元酌派旗營練兵馳赴營口並飭前任副都統傅崇武前往管帶歸該撫節制調遣○乙卯夕 月於西郊○戊午諭軍機大臣等祭酒王先謙奏長江水師請飭彭玉麟酌度或將各營量為調撥審擇要隘歸併屯紮船隻墩位有不合用之處酌量變通務求盡善閩滬船廠所造兵輪船請併歸彭玉麟總理并令保舉賢員協同管理將弁勇丁嚴加簡汰由長江

水師中選擇候補其不合用之兵船由該侍郎會同船政大臣奏明改造等語所奏各節是否可行著彭玉麟體察情形酌度具奏○左宗棠奏以非材謬膺關隴新疆重寄計踰十載圖報未遑願以出屯哈密所有規畫布置大略已具摺陳明伏讀 諭旨左宗棠著來京陛見一面慎舉賢員堪以督辦關外一切事宜者奏明請旨俾資接替欽奉之下謹卽料理起程惟關外一切事宜必賴賢能接替始免他虞竊見幫辦新疆軍務通政使司通政使法福靈阿巴圖魯二等男劉錦棠志在匡時才能應變隴中關外夙著勦勦近辦新疆善後事宜威惠並行臣嘗愧不及如蒙 恩命督辦關外一切事宜必能勝任劉錦棠前聞臣到哈密擬卽前來晤商軍務臣比覆書止之茲臣既奉 命來京軍事需人接替比卽馳告劉錦棠仍速來哈密商議一切由喀什噶爾赴哈密共五十四站劉錦棠得信後起程九月杪始可到此計其時已奉有 諭旨矣如蒙 恩允以劉錦棠接替是否並將 欽差大臣關防交劉錦棠祇領此應候 諭旨遵行者一也安肅道員駐肅州地在關內兼轄關外玉門安西鎮迪道駐迪化州兼轄鎮西廳則地在關外哈密廳介居其中向歸陝甘總督統屬茲既督辦關外軍務應劃哈密廳鎮西廳迪化州併歸新疆而玉門安西州地方營務及驛站仍由該地方文武管理歸安肅道考核舊歸陝甘統屬庶陝甘新疆界限攸分責成考核均歸畫一臣以陝甘總督督辦新疆軍務固無所庸其分晰至關外軍務接替

有人則必劃明彼此俾其各有遵循伏乞 聖裁如以督辦新張軍務署銜不用關外兩字更覺分明此
應候 旨遵行者二也臣俟劉錦棠行抵哈密會商一切交卸山務卽當馳返蘭州清理案牘陝甘督篆
是否卽交楊昌濬接署出自 聖裁臣交篆後卽取道秦晉北上不敢遲延惟頻年力疾從戎略血脾泄
諸證時愈時發藥餌無效近則健忘益甚步履維艱頻年以來杖不釋手每遇祭祀典禮降拜跪輒須
參扶以防傾跌形極衰頹情同戀棧此衷耿耿不敢自明茲幸 仁慈曲逮俾釋仔肩或者長依 日月
之光稍延桑榆之暮景曷勝欣幸感激之至又奏才難之歎自古已然史牒所稱名德重於當時卓有
建樹者可指數而稽而猶不免異時之遺議況可概諸行列粗才乎 朝廷擇將固宜先體用兼備之人
至軍營需才甚多不能求全冀備惟詐力相尚好利油滑者概宜屏棄選其質地懇實樸訥而有內心者
由什長哨長派充營官又察之臨財處事之際觀之行兵接戰之時分別進退之然後緩急始有可恃此
非可以旦夕期之者也臣所部多楚產餉章軍制較各軍稍爲明白而訓與練兩事攸分未嘗偏重亦祇
能取濟一時尙有未能愜意者現在西事未竣需才正急欽奉 諭旨帶兵各員中有才略過人堪膺艱
鉅秉性忠勇緩急足恃者並著臚列保薦用備任使竊上項人員現均在事體蒙 天恩淳摺提鎮其人
之才否又爲劉錦棠楊昌濬所深知 臣既遵 旨交卸未宜保薦市恩劉錦棠楊昌濬亦斷不致屈抑人

才別有論列應否免其贖列保薦伏候 聖裁其中才有可用因資斧無措未及進京驗看者臣當遴帶數員酌給川資隨同北上又前浙江提督黃少春自咸豐十年隨臣由湖南募勇東征轉戰江皖浙閩粵東論功洊擢浙江提督素得軍民之心上年因親病告假回籍省視臣比緘致何璟屬其堅慰慰留嗣聞其回湖南已請 旨開缺矣諒鍾麟書來猶以不及籲留為歉該員忠勇幹練臣所素知如緩急需人請飭其遴選數營應調必當有以報命但令其輕騎前往則虎無爪牙亦必無益 上諭軍機大臣等左宗棠奏遵旨覆陳並布告情形及請免保薦人才各摺片覽奏均悉左宗棠現在料理起程來京關外一切事宜應即交替劉錦棠威望素著辦理新疆善後事宜諸臻妥協著理欽差大臣督辦新疆軍務俟劉錦棠到哈密後左宗棠即將欽差大臣關防交給祇領所有新疆一切布置並著詳細告知妥為籌辦即行迅速北上所請派陝甘總督榮祿著聽候諭旨金順駐紮西路距伊犁較近一切邊防情形著隨時與劉錦棠和衷商辦以維大局喀什噶爾亦關緊要劉錦棠起程後須派得力將領認真防守毋稍大意前諭左宗棠保薦將才原以該大臣平日留意人才見聞所及必有深知其人堪膺任使者不必據定現在新疆軍營之人仍著臚舉以聞黃少春已照章鍾麟所請諭令赴浙辦理防務矣將此由六百里各諭令知之○己未 上諭 醇皇殿行禮○諭軍機大臣等鮑超奏山洲起程日期一摺該提督於八月

初十日起程前赴湖北卽會商該督撫將選募勇營及一切事宜妥爲辦理懷遵前旨先行統帶十餘營迨日北來其餘各營設法陸續起行現在事機緊急該提督務當迅速到防以期有備無患不得稍涉遲延○庚申諭軍機大臣等李鴻章奏查明天津山海關等處地方情形請行辦理等語天津爲畿疆門戶山海關係東北要隘現在李鴻章會同恭籌扼紮自可無虞惟永平府屬之昌黎灤州樂亭沿海一帶尙覺空虛該處布置稍疎則天津山海關兩處均難聯絡一氣亟須大枝勁旅馳往屯駐鮑超乘輪船北來卽著統帶各營徑往撫甯境內之洋河口停輪卸載擇要分紮與李鴻章會同恭隨時會商調度以固畿輔屏藩該提督驍勇善戰朝廷素所深知昨據奏稱已飭各營恪遵紀律所過秋毫無犯等語所奏甚是行軍之要紀律爲先況直隸各屬迭被偏災地方元氣未復尤宜嚴明約束俾兵民得以相安所有該營餉需軍火等項銀兩山戶部撥給卽著該提督自行派員赴部領用覈實報銷○辛酉劉治平奏現當經費支絀庫款尤關緊要近來部庫弊竇百出尤不可不急爲整頓風聞戶部各庫有句串辦工各衙門辦買折價任意開銷冒領分肥等事今春緞疋庫搶劫銀兩一案其中不無情弊該堂官因情節支離是以奏送刑部審辦乃刑部既未能根究含混了結殊失剔弊扶奸之義至於銀庫庫兵尤屬招搖闖每屆挑取庫兵之時或本旗應行咨送而無人可挑或有人可挑而不應咨送皆不惜重資互相頂替甚至

有漢人冒旗下閒散挑取者且有宗室職官募一閒散挑取而腦中坐分其利者聞去歲挑缺時有呼一名而兩人並至互爭真偽者有市經挑取卽爲人搶去者窺其情形必有與庫中書役勾串偷漏等事不然何至羣趨若鶩乎庫欸所關豈容諸多弊混若不早爲整頓恐弊竇日滋庫事之壞將無所底止上諭御史劉治平奏風聞戶部各庫有勾串辦公衙門折價開銷冒領分肥等事銀庫挑取庫兵時不惜重資互相頂替有市經挑取爲人搶去者窺其情形必有與書役勾串偷漏等弊請飭查究等語著該管各堂官督率司員嚴密訪查一經發覺卽行從嚴究辦以剔弊端○壬戌諭前據降調順天府丞王家壘遣抱赴都察院呈訴前在奉天學政任內提用考試經費一節將軍銘安所奏與前次函咨不符等語當經諭令潘斯濂確查具奏茲據查明奏到此案王家壘因考試加提生息銀兩致滋物議實屬辦理不善業經降調著毋庸議至銘安於王家壘加提生息銀時因礙難阻止當卽咨復飭司發領前後咨奏亦有不符銘安著交部議處○子傳濟堂功德林煮賑米三百石並加賞五百石○甲子子故漕運總督文彬於清江浦建祠○諭軍機大臣等曾國荃奏起程赴防遵旨覆陳一摺曾國荃現已由津赴防力疾從戎其見公忠體國所陳兵力單竭僅能督率宋慶郭寶昌劉維楨等軍防守山海關一路若調遣旁軍節制旁路深恐力有不及等語固爲慎重軍事起見第該撫威望素著謀略深長當此防務喫緊之時實有非他

人所能勝任者曾國荃總當懷遵前有力任其難節制各軍妥籌布置以副朝廷倚畀所有博崇武營帶
旗營練兵仍著歸該撫調遣以一事權○乙丑諭軍機大臣等禮部奏據朝鮮國王咨稱該國講究武備
懇為轉奏請旨俾該國匠工學習器械於天津廠等語著李鴻章妥籌具奏其咨內所請簡選解事人員
或於湯外習教一層並著李鴻章詳審其意一併妥籌迅奏該國使臣業經該部安置居住俟該督擬奏
到日再降諭旨原咨著鈔給閱看

臣朱壽朋敬編

臣章士瑑恭校

九月丙寅朔李文敏呈進江西通志○丁卯飭譚鍾麟清查浙江荒地○己巳諭此次恭送 穆宗毅皇帝 聖容 實錄 聖訓 玉牒 冊 暫前赴盛京除綠營官兵照例派出外護軍統領前已派出恩全仍著酌派章京護軍校帶領護軍二十名山京城恭送至山海關再行回京並派盛京副都統薩德署禮部侍郎蘇宜帶同該處派出官兵先期起程迎至山海關敬送至盛京以昭慎重岐元等仍照例出郊跪接不必遠迎至派出乾清門侍衛一切應得之項著照大門侍衛一體給與護軍營官兵計日應得路費銀兩馬匹等項著照行營國兵之例給與至此次隨往之官員兵丁夫役人等著世鐸隆懃恩全妥為約束毋許稍有擾累其按站住宿處所官員等如有令地方官預備公館需索供應者該王等據實參奏並將該地方官一併參處事竣後並飭令同日進城毋許逗遛奏請 玉冊回京之日仍著隆懃沿途彈壓一體辦理以昭嚴肅○丁寶楨奏查禁楚復准之議經部臣迭次奏奉 諭旨嚴飭照辦前兩江督臣沈葆楨亦首以此為急務迭經籌議整頓准鹽包認盤嗣意以為復准之舉若有不俟終日者在

部臣及前兩江督臣籌念大局至誠苦心臣本年二月接准部咨以禁川復准有關課餉具奏請旨飭下兩淮川楚各督臣迅速籌辦等因查原奏內稱查川鹽行銷行楚當時原只暫為通融故於官不計考成於商不報名姓邊計套搭混雜難稽其間重照影射重斤夾帶百弊叢生迄今久假不歸商鹽既便其私隘官吏且倚為利藪是不獨南鹽大受其害實並為川鹽之巨蠹尤不可不早為禁絕等語臣以楚岸本准鹽引地成憲昭垂不容紊越況現今部臣及江督竭力籌辦大局不可不顧廷旨不可不遵部議不可不從禁川實屬要務但川鹽自滿楚以來為日既久井鹽日添而且從前定例當場原應配行邊引故每甬多燒巴鹽少煮花鹽以資轉售今因滿楚一行該廠井鹽大半多燒花鹽其煮巴鹽者不過十之一二今若議禁楚復准必先將該廠井鹽所出之鹽籌出銷路又必為行楚之商號覓路營生方為妥協是以臣自三年到川後即實力籌開黔滇邊岸冀為該廠各商開辦世銷路使鹽有售處雖滿楚停止商鹽仍各安生理不至歇業苦累期為萬全之策幸自官運開辦以來滇黔引路漸通每年所行邊計已可抵從前滿楚之數從此逐漸疏通川鹽銷路日寬淮岸自可漸復所以為川淮商鹽計者無害於此近因兩淮認包撥餉尙無定局楚岸本未即停止詎當廠奸猾利徒時藉楚鹽刻即停運之說以惑弄商號為射利之計而商人聞此謠言不察虛實遂謂即日停楚爭相搶買囤積冀停楚後可以獲數倍之利不顧成

本之輕重不計銷路之寬窄誠恐囤積過甚鹽斤壅塞勢必爲販戶把持不至折本歇業不止且鹽斤囤積在楚者日多一旦真能復准則銷行不及不惟川商受累無極卽淮鹽亦必阻遏不行臣因念鹽價日增目前之商本既促後來之辦理殊難不得不預爲之計以期面面兼顧因於本年三月內以禁川復淮如因鄂餉一時無著則濟楚自未可卽停乃查照前兩江總督臣沈葆楨逐商減引行楚以爲釜底抽薪之法奏請於行楚引張每月准驗配七八百引以示限制漸定復准張本庶朝廷 諭旨及部臣奏議均可以次遵辦而其時富廠又有以六月卽行停楚之說捏造謠言廣爲散布愚弄商人而商人爲其所惑不查虛實羣起爭購以致居奇擡價變化百端而不知濟楚本未卽停若不明白曉示限制一任奸徒影射愚弄將來商鹽成本過重楚岸銷路只有此數勢必至鹽斤充塞受人把持賈賤賣賤則折本歇業自在意中臣職司鹽政不能不體念商情因於具奏之後卽將現議川鹽每月限行七八百引之數一面行知示諭俾各商知卽時停止濟楚之說係屬謠言不至受人惑弄並令各商隨知行引有定數亦可免彼此爭購致令井戶居奇惟昨准部咨以川鹽之浸灌淮岸者有增無減若非停運川鹽則淮銷終無起色若徒酌減引數恐官鹽雖減私鹽更增有損於楚無益於淮等語是欲川鹽概行停止實爲正本清源之論第此時鄂釐無著濟楚尙未能卽停而射利之徒乃因以藉端搖惑使商人貪多搶買致楚岸愈囤愈

多銷路必滯商本虧折情殊可憫且鹽積太多即將來禁楚定局川鹽既經壅積准鹽不能暢銷似亦未
爲得計又況川人多謠若停楚之成規日久不定致廢鹽之浮議日久愈多卽官運購配黔滇各岸亦因
此諸多牽制部臣所云濟楚不停不獨南鹽受害實並爲川鹽巨害者誠爲洞燭隱情可否請 旨飭下
部臣查照再行核議如濟楚現時未能卽停仍請查臣酌減引張以示限制之奏暫爲通融辦理俾行引
確有定限則浮議不能惑人井戶自無從居奇商鹽亦不致折本俟日後復准一定楚鹽既少國聚淮岸
自可望大銷實爲兩全之策下戶部議奏○庚午以敬信爲內閣學士○頒給山西靈關縣風穴山 風
伯神廟靈石縣綿山 介神廟匾額○辛未李鴻章奏朝鮮僻處海隅向於外交之道禦侮之方漠不介
意日本窺其孤弱竊以兵威先與立約通商實則隱圖侵侮去年七月 臣密奉 諭旨查照前福建撫臣
丁日昌所陳各節致書原任太師李裕元勸以密修武備慎固封守與英法德美諸邦逐漸立約藉以牽
制日本卽可備禦俄羅斯並告以熟悉西國商情軍火利器不難購辦等語今該國既以講武爲請正可
因其一綫之明迎機善導增彼軍實固我藩籬惟是該國練習此事卽使始終勤奮其收效亦在數年之
後就日前事勢而論則有迫不及待者自去冬以來中俄和約未定積有違言俄之鐵甲快船兵船二十
餘隻陸續東駛並厚集陸軍分布吉林海濱之海參威摩闊咸一帶豫儲煤糧軍火甚富六月間有美國

水師總兵蕭爾赴朝鮮議約被拒旋來津與臣會晤據稱美國向無用兵倡勸之意但俄人已費巨餉遣將調兵勢必不肯中止若不圖中華恐遂吞併朝鮮八月間法國水師提督豐貝賽過談謂探聞俄海部尙書里沙士幾之意欲赴珲春攻擊朝鮮海口陸則斷奉吉之右臂水則扼北洋之襟喉規畫甚爲雄遠又謂朝鮮東界海口形勝爲東方之最俄人故欲取之以與珲春海參崴等處犄角其餘各處探報及新聞紙所論大致相同蓋俄人所據之海參崴綏芬河圖門江各境皆與朝鮮東北接壤彼既佔東海口岸爲巢穴自必漸圖開拓若吞併朝鮮即拊我東三省之背使中國岌岌不能自安是朝鮮與我國實有唇齒相依之勢不能無休戚相關之情當此兵餉兩絀中國沿海各口尙未能處處周防斷無餘力兼顧藩服似祇能就其力所逮者而利導之萬一俄事稍紓朝鮮得於數年內力擴新機整軍經武保衛東隅未始非中國之幸也惟該國匠工來津學習機器此中亦有繁難之處查天津初設機器局不過仿造外洋火藥銅帽等項厥後疊次擴充添購機器火藥多出數倍自造士乃得林明登後膛鎗子克鹿卜格林後門礮子蚊船大礮子之屬光緒元二年間亦曾自製後門鎗因工費甚鉅較購自外洋者價幾逾倍卽經停止各軍所用鎗礮專向西洋定購但源源供給子藥零件今朝鮮匠工來學卽使盡嫻各法固該國所用土鎗僅與中國綠營之擡鳥鎗相等其製造機器及新式鎗礮仍須購自外洋是無其器而不能

用也西洋鎗礮其準縫口令步伍非操演數年難以純熟是無其人而不能用也臣愚以爲既准該國來習機器將來必須代爲購器代籌練兵皆事之連類而及缺一不可者又該國匠工言語不通來局之後應如何設法教導俾漸窺門徑擬請 敕下禮部據派通事人員伴送該國使臣卞元圭到津由臣督同局員與之熟商辦法再行奏明請 旨施行至該國王原咨內所稱簡選解事人員或於過外習教及來學往教等語又義似未甚明晰臣就事理度之今如中國派員往教該國既無機器匠工又無現成鎗礮斷難獲益自應先由該國挑選匠工來廠學習并選聰穎子弟來津分入水雷電報各學堂俾研西法本京兼營較有實際至練兵一事將來或選派熟悉員弁往教或由該國派隊來從我兵操演礮器一事或乘中國訂購之便寬爲籌備劃付均應隨時酌度情形妥商辦理 上諭軍機大臣等李鴻章奏遵籌朝鮮請派匠工學造器械一摺朝鮮爲東北藩服督商相依該國現擬請求武備請派匠工前來天津學造器械自宜俯如所請善爲指引已諭令禮部據派通事伴送該國齎奏官卞元圭赴津著李鴻章詢問一切情形再行奏明辦理李裕元致李鴻章書兩並著酌度情形作費咨覆俾知領會○壬申鮑超奏恭奉 諭旨命將所請馬隊即在原募二十三營之內酌量改設毋庸添募仰見 聖訓周詳節虛糜而求實用之至意竊北方地勢遼闊宜於馬隊敵若潰敗速戰必須馬隊方能擒截追剿庶馬步相輔而行

可期一戰以挫其鋒上慰宸慮當與湖廣督臣李瀚章湖北撫臣彭祖賢籌商妥協議裁減左右親兵二營改設馬隊照前摺所請裁半招募一千五百名其步隊則僅有二十營及親兵一營減無可減復於八月二十一二十五兩日疊奉諭旨僅令臣先率十餘營限八月內到防不准稍有遲誤並多撥輪船裝載惟是招募勇丁易於齊全造辦軍械稍需時日自臣到鄂省晝夜不遑者三日即將在鄂所募馬步隊之將領營哨各官精選齊備委令記名提督何紹彩統帶霆軍長勝五營記名提督徐連陞統帶霆軍馬隊正三營記名提督江自康統帶霆軍馬隊副三營飭令迅速開招現在勇丁業已募齊所需餉項臣未到之先督臣李瀚章撫臣彭祖賢早已預辦三月並籌欸補足湖南十六營一月之餉惟鍋帳旗幟等件前經飭局晝夜製造臣亦派各營幫同督催限九月初一日起齊一半卽日紮營成軍惟官局輪船經李瀚章彭祖賢連日飭催現趕到海定輪船一隻卽飭徐連陞江自康先統鎮將營哨各官帶領兵勇於八月二十八日卽坐此船馳赴天津鍋帳隨後解到徐連陞到津後卽令其面謁督臣李鴻章領訖馬匹鞍轡至銅帽洋藥爲軍中要需輪船向不運載可否就近飭天津機器局源源接濟運解來營抑或籌撥他處相應請旨定奪湖南之十六營已於八月十七十八等日起行臣令其採辦數月行糧因洞庭阻風迄今未到如值順風已早抵鄂矣臣急於星火連日飛催如三四日內可到並俟輪船到鄂卽率數

營先至防所如再阻滯卽令總理營務處記名提督申道發統帶官提督何紹彩鄧訓誥熊鐵生向世珍等各統率所部陸續星夜北上臣卽搭招商局貿易輪船先行馳赴天津與督臣李鴻章籌商駐防一切情形可否就近入都面請 聖訓俾資恪守伏候 批示祇遵 上諭鮑超奏酌改隊伍情形請飭接濟軍火一摺著李鴻章遵照疊次諭旨酌量辦理鮑超募勇成軍卽著迅赴防所毋庸來京請訓○癸酉左宗棠奏此次瓜子溝煽亂除陣斬要逆哈力等及首逆勾羊任節各犯解省審辦外當起事之初各番莊聞風響應乘亂糾眾燒殺之犯尙多在逃未獲非嚴加捕治不足以靖伏莽而安善良卽賑撫亦多滯礙臣等分飭查辦去後茲據前署蘭州道劉璣稟稱遵派員弁分起搜緝先後拿獲要匪雙劍五斤半鮮住點科都意浪丹如洗狸面阿占洗河占洗哈點住李當老皆盜跛子和尙瘋子羅漢雞子大現周大三斤半假古兒先二血坎結張唔哪嘛銀四十根的張四十三七點扎什根存西利扎巴齊切南坪道士當知等二十八名到營或質以原告按以匪供證以良番又使各匪互相質證各供糾眾燒殺拒捕掠掠不諱應請就地正法其被獲訊係情節較輕之馬代李開友三背相巴吹兒毛牛代歲子等六名交保令其贖罪自贖又前次各營誤拿送加管押之順橋黑巴扎什跟招跟易屈吉云住趙次獨止等七名訊係良番被獲應予開釋備錄供招稟齋前來臣等覆核劉璣擬辦各節分別著良無縱無枉當經批示照辦現

在番境平定飭劉璣率所部回省以重操防仍留左路後營副將李志剛安左旗提督陳再益分隊扼紮該處以資鎮壓其時州及番民賑撫暨後未盡事宜概由龍錫慶妥籌辦理查甘肅一帶春夏兩澤應時二麥秋禾均稱豐稔現在糧價平減居民尙易謀生賑務稍鬆惟修濬滯水渠道路坍塌城垣各工尙需時日始克蒞事報聞○甲戌譚鍾麟奏竊承准軍機大臣字寄光緒六年七月初四日奉 上諭有人奏浙江省清查荒蕪辦理失宜恐釀事變一摺等因欽此遵 旨寄信前來竊維浙江省田產之弊一在官吏之侵漁一在民間之欺隱十餘年來舉所侵所隱者悉歸之於荒以致缺額甚多無從稽考臣深悉其弊去冬到任後遍飭各屬將境內荒田詳查令百姓自行插標田畔計明畝數界址由地方官親行履勘造冊申報聽候委員覆查並諄諄告誡但令百姓種一畝熟田完一畝錢糧州縣官徵一分錢漕解一分入倉庫初無誅求於民之意亦無苛責於官之情第荒田可廢勘而稽侵漁可嚴核而知惟欺隱一項非民間自行舉報官無由得其實數必須曉以大義諭以利害寬其既往懲其將來庶紳民不至疑畏固陋叢譴雍正五年五月十五日 上諭開墾地畝本應隨報隨墾之罪定例甚嚴祇以法久弊生遂至墾多報少或爲民間隱漏或爲官吏侵漁積習相沿至於年久而多方迴護百計掩藏於隱糧漏科之外又添欺罔之重罪此等之人雖時中獲利幸免錢糧然到底干犯國法難免旁人訛詐欺凌豈能安然坐享

愚昧無知之徒往往如此深可憫惻今朕特沛寬大之恩准各省官民自行出首將從前侵漁之罪悉從寬免其未納之錢糧亦不復究問定限一年令其首報倘逾限不首復行查出在官在民定行從重治罪著各該督撫轉飭地方官通行曉諭開導鄉愚在國法無耕田而不納賦之條在天道亦無背公而能獲福之理當感朕寬大之恩急公向善共為良民以受國恩以免罪譴欽此臣於二月接准部文恭錄光緒六年正月二十五日諭旨咨行到臣當即欽遵出示曉諭仰體朝廷寬仁之意廣為開導通省軍民人等食毛踐土宜思 覆載恩深我 朝輕徭薄賦厚待民生值籌費方殷之際加派毫無此次清查糧賦以應要需若仍隱匿不報是誠何心自示之後務各激發天良力除積習趕將自己名下未經呈報之成熟田地及從前短報之產開明坐落畝分據實赴縣呈明既往之咎不復深究倘再陽奉陰違推諉延宕則是自外生成法所不貸無論紳民提省分別懲辦並將短報之數歸於成熟田地項下按畝攤賠以足歲額所謂未經呈報之成熟田地即隱匿不報者也所謂短報之產乃十畝僅報五畝之熟田也大凡文告有勸諭之語有儆戒之詞此今昔通例而原奏抹去前文僅摘陽奉陰違數語指為操切竟以通省荒產悉攤之於熟田勒令民間完糧安得有此辦法果爾又烏用查荒為耶夫荒產必逐漸招墾非剋期可竣誠如 聖訓果能認真查辦行之數年何嘗不可漸復舊額自應敬謹遵辦臣告示中所言力指墾

多報少始終隱匿之熟田也。臣恐莊書地保朦混舞弊。復經示諭各村莊公舉正派紳耆。將村內荒產查明造一草冊送縣。本村自開一單黏之通衢。以便地方官下鄉核對。不容其役地保以荒作熟。累及小民。此通省所共見者。而謂大張謠諭。勒荒為熟。此莊書地保恐嚇鄉愚之語。百姓之明白曉事者。不之信也。得旨。仍著該撫認真清查。總期有裨國課。無累民生。方為妥善。○諭誠端奏明代陵寢左右有開墾地畝各情一摺。據稱前往昌平州致祭。明陵查有開墾宮牆左右地畝十數餘頃之多。並有斫伐樹木情形。詢之地戶。稱係現在升科等語。此項地畝是否應行開墾。並樹木砍伐情形。著順天府督飭昌平州確切查明。據實具奏。○乙亥歲五城煮賑米石。○內子金順奏呈進貢馬報聞。○戊寅戰彩奏光緒五年九月間上駟院奏奴才衙門所屬十五園各設有廐長一員。經管餵養馬匹。駟頭口糧一切差務。廐副二名輪流值宿。看守餵養之差。惟查茶備。皇太后位下乘車駟園尚未派委廐長經理。僅派司員兼管。不足以專責成。自應按照各園章程。派委廐長廐副經管。以歸畫一。擬請由羣檔房牧長內派撥一員。作為該園廐長。經理餵養一切差務。由牧副內派撥二名。作為該園廐副。輪流值宿。仍派員兼管。以昭敬謹等因。具奏奉旨。允准。在案。乃奴才風聞該院郎中定昌掌稿筆帖式安吉俊貝等。膽敢朦混。未嘗將原管西駟園之廐長榮格改派。皇太后位下駟園當差並未於羣檔房內派撥。又於原奏定額外另添副

牧長常海一名協同辦理反將羣棉房牧長裕昆私行派在西驛圈均於原奏不符此中情弊昭然若揭夫以市經奏明奉 旨允行之案理應敬遵辦理乃竟敢任意欺朦藐視其平日專權舞弊納賄行私不知凡幾奴才愚見以爲漸不可長事體雖小所關者大若不認真懲辦何以重 綸音而儆效尤 上諭御史載彩奏上駟院派差朦混一摺據稱上駟院派委廳長等差即中定昌掌稿筆帖式安吉俊良等朦混本管堂官改派添派與奏准之案不符等語著該衙門堂官確切查明據實具奏○庚辰岑毓英奏臣前於剿平梵淨山逆匪摺內陳明該山向隸銅仁思南鎮遠松桃各屬所轄以距城爲遠實難兼顧擬移設州縣併歸治理一摺光緒六年六月二十一日奉准軍機大臣字寄六月初五日奉 上諭岑毓英奏搜剿梵淨山悍匪出力員弁請獎一摺餘著照所議辦理等因欽此溯查貴州省明代始入版圖從前苗多漢少既有土司彈壓又設重兵鎮撫民事不多在州縣管數百里之地可以遙制今則漢苗生齒皆繁幾有鞭長莫及之勢而邊要莫如梵淨山查該山周圍六百餘里界連四川湖南附近該山之黔境向歸銅仁思南鎮遠松桃等屬所轄均距城二三百里或三四百里不等平時有司微錢糧驗命案皆因地方窳遠已屬往返需時而查緝奸宄尤爲耳目所不及至逆匪盤踞六年生靈塗炭今年夏間臣親往搜剿肅清後周歷其山揆度形勢似非移縣治於適中之區不足以資控制查松桃鎮遠兩屬縣皆地要事煩

擬難更移惟銅仁府之銅仁縣思南府之安化縣但係附府首邑尙可移置蓋黔省郡縣制度與他省微有不同如知府一職不但表率屬僚兼與州縣分管地方皆係理事收糧所以興義府之興義縣另駐要隘並未附府而大定石阡思州等府亦無同城知縣今移銅仁安化兩首邑擇要駐紮仍與知府分界而治核與黔省制度亦不相背當飭各屬官紳妥議並與司道悉心籌畫查銅仁縣屬之大江口丹棋可通商販雲集距府城九十里距梵淨山脚亦九十里若將銅仁縣移駐大江口卽不至顧此失彼又查安化縣屬下五里之大堡距府城七十里附近沿河司接壤四川爲沿岸川鹽入黔要路距梵淨山尙不甚遠該處人煙稠密商賈輻輳若將安化縣移駐大堡不僅於下五里沿河一帶有益卽控制梵淨山亦覺稍易下部議奏○諭軍機大臣等詹事府左庶子張之洞奏敵船若入遼海必趨營口今日海防宜備者奉天非山海關關外形勢營口爲前敵錦州爲重鎮統帥宜駐於此方可左右策應宋慶郭寶昌劉連捷劉維楨四軍分相敵而情不相狹且湘楚皖豫餉章厚薄不同尤須主帥較近方能鎮撫調護等語所奏是否合宜著會同國莖與李鴻章會商妥籌具奏○辛巳諭知武舉許應驤奏山東省挑入雙好之武舉宋金鐘於內場復驗時不能復開原弓查訊係因臂傷尙無頂替情弊應否扣除請旨遵行等語宋金鐘著卽扣除○壬午諭御史徐文洞奏各省州縣紛紛更換請飭部明定章程量予限制等語著吏部議奏○懷

訓丁寶楨奏臣等查明峨夷此次出巢滋事係由文武官撫馭失宜並非馬邊窺入現將該廳通判楊銘營參將倪天元撤任另委候補通判姚建寅儘先副將彭炳輝接署廳營兼務並令會同前派泰安武字兩勇營認真妥辦前據楊銘等報稱六月初一日夷匪在城外之觀音巖掘牆初七初十等日又窺核桃坪劉家溝捆去男婦多名燒燬民棚堡勢甚披猖臣等以姚建寅等均係新任必得明幹大員督同籌辦方能得力查有管帶達字左營補用知府張世康紀律嚴明夷務熟悉當飭率領所部勇丁前往督同相機剿撫又因夷地林深箐密路道紛歧必須四路兜截剿捕方不致落空復調壽字右營遊擊何炳元率勇馳往與泰安武字兩營暨廳營哨弁兵勇均歸張世康調遣以一事權茲迭據張世康稟稱查明峨夷十三支惟冒姓雅紫別號等支族類極繁向多滋擾並探悉甸串雷波廳烏拋等支生夷乘間夥同搶掠當即審度地形距廳城六十里隔河之化林坪羊腸一綫地勢極險為夷匪出入咽喉化林坪以外蠻寨聯絡必先扼其出巢之路而後剿辦乃有把握隨派隊前往分營扼紮遂有哈什等三支聞風震懼由附近圍約緬稅投誠張世康察其歸順真心分別犒賞給示令安住牧一面派泰安中營副將林叢文暨署參將彭炳輝率兵勇由左路進紮梯子巖大礮臺各隘口堵截由扯各支派武字副前營總兵唐珊峰暨遊擊李飛龍率屬營各勇由右路進紮龍兒埂鵝頂頸各隘口堵截別挖各支張世康督隊居中策應搭

造浮橋攻雅紮堅巢七月二十七日渡河夷匪呼號蜂湧而來我軍鎗礮環施礮斃兇夷三十餘名傷匪百餘名該夷被創奔竄墜巖落澗數百人張世康督勇直前立將化林坪險要占據並將營壘登時築成該夷失險叫譟爭各兵勇密排鎗礮四面轟擊即紛紛潰退八月十一日左路林叢文等將隊進剿圍包山夷匪約數百人由山半突出有騎馬夷酋二人揮眾直前拒敵署雙溪汛千總王春芳率馬兵王經緯羅天元及各兵奮勇直前攻擊立將夷酋二人生擒到營復殺斃兇匪三十餘名帶傷十數名餘皆向深林奔匿汛弁戴占標復擒獲悍夷一名訊名木雞牽扯搖手供認屢出燒搶不諱當在軍前正法十二日張世康督隊前攻忽山腰中突出蠻匪數百矢石齊飛各兵勇奮不顧身縱橫直進斃匪十餘人匪勢不支千總朱國祿遇一兇悍夷酋持矛刺其左耳該千總莫創血戰遊擊李鴻順乘勢進前將該夷酋矛桿挽住遂將該夷砍斃夷眾全行奔潰十四日右路唐珊峰暨千總羅占魁薛占鼐賴占虹由白沙溝搜剿又傷夷匪數名並生擒夷娃夷婦五名連日計殺斃悍匪約三百餘名奪獲氈衣木弓弩箭刀矛七百餘件救出難民七十餘人陣亡勇丁孫國壽七名兵勇帶傷者十餘名夷匪漸知畏威多欲投誠等情前來臣等以夷人慣狡恃其山深路險專以埋伏見長每遇官軍輒不戰即退及官兵乘勢跟追而四面之埋伏猝起往往受其傷害自須各營步步環攻方能遏其竄逃得以大加懲創當諭張世康聯合各營層

層接應務將該夷匪設法痛剿使其力感勢窮自行帖服然後准其投順以冀日久相安正批飭間接據駐防雷波經武營提督邵永齡署曹安營參將周興祿署雷波廳通判趙席珍稟稱涼山野夷聚烏拋阿忽各支約數百人前於七月內因峨邊夷匪勾結由沙灣老林出擾經兵勇出擊斃匪五名救出難民十餘人又竄大漢汛山王廟燒燬民房多間傷斃團丁八名邵永齡等各督兵勇擊退突於八月初六七八等日有夷酋木姑糾匪二三千人竄至廳城附近一帶邵永齡等一面防守並派總兵周勝得向集椿千總毛廷魁軍功許洪順等分帶隊伍出城剿擊木姑率匪撲近城下向集椿直前抵禦被木姑拒傷左項復忍痛揮刀力擊砍傷木姑肩臂周勝得等繼進立將夷酋木姑生擒回營向集椿傷重逾時陣亡各夷見該頭目被擒登時驚潰四散官兵乘勝跟追殺斃夷匪七八十人該夷退出城外三十餘里之牛哩水地方因目前兵勇不敷分布請兵添剿等情當經臣等會商飭令提督銜補用總兵李培榮統領所部壽字各營馳日馳往督同該廳營認真剿辦並飭該文武悉聽李培榮調度俾免意見參差復令隨時知照峨邊各營互相剿擊迅速肅事已於八月二十一日率隊啟行臣等查夷匪野性難馴貪利無厭其平日皆以捆人搶掠爲事又多恃其地居荒遠山菁叢密易於藏身官兵剿捕多不能及故往往一股滋擾羣夷卽從而附和追官兵剿捕前進事急則請命投誠事過則潛出肆擾此其積習峨邊雷波與馬邊

各夷緊連夷人性情欲令懷德先使畏威故必於生亂之夷嚴加誅戮歸化之更加意撫綏俾其畏而知感地方庶期安謐 上諭軍機大臣等丁寶楨奏剿辦峨邊出巢夷匪疊次獲勝分別辦理剿撫一摺該處夷匪疊次滋事必使之懷德畏威方可安其反側著丁寶楨飭令張世康李培榮等認真剿辦分別良莠剿撫兼施並飭該處地方文武一律嚴防妥籌辦理毋稍大意○慶裕奏廣西前議酌減鹽釐徵收西稅自同治十年正月試辦起山鹽道遞年應徵銀七萬五千五百二十兩一錢四分三釐同治十年及十二等年徵收西稅不敷原額銀兩均經前撫臣劉長佑奏准在於鹽釐項下撥補清欸在案同治十三年徵稅仍難足額照案奏請撥補接准戶部議擬粵西徵收西稅歲入有常豈容借撥補名目為規避處分地步飭令查開鹽道局卡委員經徵分數職名送部一面仍將短欠銀兩勒限照額徵足并令此後自光緒元年起應徵西稅按額全完等因嗣後咨催迅速補征報部並將光緒元二三四四年西稅趕緊按年造報均經前撫臣迭次飭行鹽道遵照實力督征完解茲據鹽法道慶愛會同省局司道詳稱查西稅一項向由廣東運司征收移解道庫按年清欸入冊造報奏銷自咸豐年間軍興以來西省行鹽準地均遭賊匪蹂躪商逃準歇額稅虛懸廣東運司後委員在梧州設局招募水客折運行銷征收餉稅西省亦在催辦濟餉水客遂以釐為藉口屢請撥釐抵稅應完西稅歷年拖欠任催罔應同治十年前撫臣蘇鳳文

奏明減撥征稅在於梧州河面設廠試辦按包徵銀二錢七分五釐抵解稅款所徵之銀分別照例支銷撥充軍餉於春秋撥冊內登明造報自同治十年開辦起所收西稅缺額甚鉅先後添設南甯永淳懷集賀縣昭平等卡照章征收藉資彌補核計每年所徵之稅尙短銀一萬有餘不敷年額歷任撫臣以西稅關係正項未便虛懸無著奏明在於鹽釐項下按年補撥足額仍由鹽道入冊報撥分款奏銷同治十年十一二等年短徵西稅銀兩均奉部復撥補清款十三年短徵不敷銀兩照案請撥部議未准撥補飭令照款徵足並令自光緒元年起按額全完當經遵照迭飭各卡委員設法整頓實力徵收仍無起色徵特不能彌補虧欠而連年應徵之稅缺額甚多實因西省地邁蹂躪戶口蕭條行銷鹽斤難似從前之暢且原奏減撥徵稅聲明廣西通省六十六卑每年額配正餘改增等鹽二十七萬五千六十六包八十五斤應徵西稅等銀七萬五千五百二十四兩一錢四分三釐勻而計之每包應完銀二錢七分五釐以抵西稅等款鹽法定制各卑額配之鹽係按潮平一百五十斤爲一包係合市秤一百六十八斤有奇征稅之鹽本應按定制一百六十八斤成包而西省抽稅係以淨鹽二百二十斤作爲一包彼此解數不同開辦之時署任撫臣李福泰爲恤商計飭令一律照鹽釐二百二十斤作一包征稅計每包加重五十餘斤是應照四包征稅者只收得三包稅銀且鹽斤日行滯銷近來東省來鹽總不過二十萬包較之額配鹽數

懸殊西稅短絀職此之由並非征收不力此頻年稅課缺額實在情形今循辦有年若更鹽包之議按一百六十八斤收稅商情必不樂從且釐稅併收本覺其重再議更張亦勢有所難辦維再四只有招商承課責成按款完繳較有把握當經詳委補用知府吳熾昌赴廣東稟商督臣及運司招商承辦準務按額運鹽行銷認完西稅一時尙乏承辦之人而稅課短絀無術補苴核計同治十三年短徵銀一萬二千七百二兩三錢七分四釐光緒元年短徵銀一萬二千八百七十六兩六錢九分一釐二年短徵銀一萬八千四百一十九兩四錢八分五釐三年短徵銀二萬四百二十一兩一錢九分四釐七毫四絲五忽四年短徵銀二萬三千七百六十七兩九錢九分六釐五毫五絲懇請照案仍在鹽釐項下按年如數撥補以符定額俟東省招有商人承辦應徵西稅銀兩卽歸東省徵解俾復舊制等情詳請具奏前來臣查廣西議減鹽釐征收西稅係因行鹽地面遭賊蹂躪準畝商逃額稅虛懸無著是以籌議試辦盈絀原無把握開辦之初前署撫臣李福泰飭照抽釐成包斤重徵收稅銀期歸一律係爲恤商以示招徠而歷年稅項短絀實因地方凋敝水客販運不前各卡委員僅能就運來之鹽按包收稅並無辦鹽承課之商可以按額備征是稅絀實由鹽包不來委非經徵不力同治十三年以前短徵之稅已奉撥釐補足十三年至光緒四年缺額稅銀惟有撥案懇恩俯准仍於鹽釐項下按年照數撥補以符定額而重正課下戶部議

奏○甲申慶裕奏廣西道府屬州縣請暫停分發二年佐雜請暫停分發三年允之○丙戌大學士載齡因病乞休允之命賞食全俸○調文煜爲正紅旗滿洲都統以額勒和布爲鑲白旗漢軍都統以梅啟照爲內閣學士○丁亥 上詣 太廟行禮○戊子諭廣壽奏體疾未愈准在紫禁城內乘坐二人小椅一擗向來滿洲賞馬大臣年未至六十五歲准令在紫禁城內乘坐小椅者原因年老足疾加恩以示體恤此外或出自特恩非臣下所能自請廣壽病未痊愈本日已給與假期乃率請乘坐小椅殊屬冒昧著傳旨申飭○周恆祺奏東省兗沂曹濟各屬界連直隸江皖素爲捻輻淵藪蕪湖蕩州范縣陽穀之黃河水套尤易藏奸俗尙悍強惑不畏法置身命於度外視搶劫爲故常但有一二狡黠之徒煽惑倡亂則若輩如蠶斯應不數日間卽能蠶聚脂集近數年來迭次屢拿懲創並黃河南北兩岸以及各處要隘俱有大軍駐防鎮攝匪徒尙知斂跡地方賴以救安乃自七月間曹州鎮臣王正起所統馬步各營全軍東行西南驟形空虛又值夏秋雨澤稀少亢旱晚穀豆禾均鮮收成人心殊覺浮動蕪湖蕩州之閭什口濮州之紅船口張家志門鄆鉅之梁山安山皇市集獨山集等處卽有匪徒夜聚明散並設立洋鎗會名目凡有洋鎗許入會書名肆出搶馬到處勾結情事居民驚惶紛紛遷避臣接據各屬稟報當檄調沂州協副將曹正榜督帶精健右營飛往曹郡擇要扼紮並令防守黃河之提督楊飛熊副將黃金得派撥勇隊會同地方

文武無分畛域嚴密兇拿嗣經曹州府知府樊希棠與楊飛熊等會商機宜帶領兵勇分投搜捕該匪隨聞風潛逃第賊情詭譎仍在各鄉伏匿往往兵至則收藏器械皆散而為民兵去則故智復萌仍聚而為匪本地紳耆畏其兇悍日後報復各安緘默不敢舉發以致查拿殊難得手僅據報獲匪犯王直胡旺等十餘名由署濮州知州朱世俊提訊王直供認聽從在逃匪首王貴蔡三謀為不軌令伊出外僱貼齊人約八月十五豎旗起事由濮州田樓馬頭渡河會合吳金貴等各股匪徒再圖分竄屬實王直即批飭先將王直一犯就地正法勘示以寒賊膽而安人心其餘胡旺等各犯供尚游移仍令曹州府研訊懲辦免致寬濫現在人心已稍安定而黃河秋汛適至迭報水勢異常盛漲南北兩岸長堤處處出險十分喫重本年守堤勇丁業又征調設防本形單薄不敷分布河工與地方並重又不能不移緩就急今飭楊飛熊黃金得迅將派出隊伍一齊調回河干復令樊希棠酌量添募民夫協力修守務保無虞閭什口等處仍由曹正榜分哨駐紮會同各地方官廣購眼線認真偵緝必將首要各犯按名弋獲究報以絕根株不准一名漏網至八月初旬省垣及各屬得雨均多深透僅查沂曹三府屬尚有未獲普霽之處惟期續沛甘霖俾得及早翻犁耕種不致有誤春收得旨仍著該撫督飭防營會同各該地方官嚴緝首要各犯務獲究辦並隨時嚴密防範以遏亂萌○己丑頒給四川珙縣洛浦龍潭神廟匾額○予貴州平越州節孝

婦方戴氏旌表○恆訓丁寶楨奏邊境交界地方有下膽對所轄查泉野番一支其人兇悍強橫向難馴服咸豐年間該野番疊次出境搶劫邊境土司帶兵往擊被其鎗斃經前督臣先後派員剿辦初未痛加懲創該野番自知不容於眾遂降於中膽對附和工布朗結爲逆迨後中膽對被藏兵剿平地歸達賴喇嘛該野番復降於咸豐年由藏派委番官彭饒巴帶兵戍守膽對隨時鈐制該野番尙知畏懼後因另派接戍之番官若康撒約束稍寬該野番仍敢復萌肆行糾擄邊境內土民糧食牲畜以及漢塘官馬甚至通勒邊境所管本拉石番民三百餘戶歸彼屬下致土司等忿極不甘本年七月初旬等接據阜和協副將況文榜署打箭爐同知李忠清稟據邊境正副土司德讓江錯更登丹批並四家曲宗喇嘛等詳稟稱伊等因查泉野番屢次欺陵擄掠不堪其苦已調集土兵數千分作兩支欲與野番打仗該野番亦聚兵抵禦稟請作主並據邊境守備馬文英報同前由等情轉稟前來臣等當查邊境糧食章紹曾已於本年三月委赴雲南中甸交界會審夷案尙未回臺接管糧員何焜亦尙未到任僅守備馬文英一人料理恐難肅事兼值駐藏幫辦大臣維慶正由邊境進藏深慮稍有疏虞隨飛飭李忠清酌帶漢土弁兵一百名兼程馳往彈壓查辦旋據李忠清報稱六月二十九日抵邊查悉該土司喇嘛帶兵一支已於六月十五日與查泉接仗殲勝擒斬野番二十餘人並收回本拉石番民三百餘戶仍屬土司另有一支往攻

查景果穴相持未下李忠清當經選派番民散信之呼圖克圖分往切實開導令兩造迅速罷兵聽候查辦並探聞若庫撤亦派藏兵三四十騎來與兩造和解等情臣等以查景野番從前頻年搶奪逼勒番民固屬頑梗而裏塘土司喇嘛等並不先稟請示辦理輒擅自調兵攻擊亦殊藐玩現經李忠清派人前往開導該土司喇嘛已否遵諭息兵尚無確信雖撥觸相爭事所恆有設因此尋衅不休釀成邊患貽害非輕當即會商揀委候補知府楊福萃酌帶親兵六十名並阜和營弁二百名星馳前往裏塘會同該處糧員何焜等相機籌辦設法解散諭令兩造罷兵靜候分別持平查辦以靖邊荒一面由五百里飛咨駐藏大臣色楞額嚴飭藏會飛行戍守曉諭番官若庫撤將查景野番認真約束不准妄行滋事自干誅戮

上諭軍機大臣等恆訓丁寶楨奏查景野番滋事情形著恆訓丁寶楨即飭派出員弁妥為相機籌辦設法解散一面選派番民散信之呼圖克圖分往切實開導務令兩造罷兵聽候查辦並著色楞額維慶嚴飭戍守番官若庫撤認真約束以弭衅端○辛卯以捐修陝西渭南縣城予紳士知府席振甲等獎敘有差○諭御史載彩奏上駟院派委廐長等差耶中定昌等有朦混情事當諭令該堂官確查茲據師曾等查明具奏上駟院將牧長榮格派充廐長既據查明與奏案相符其派委副牧長常海牧長裕昆各差亦均照成案由該堂官酌核定昌等並無朦混情事即著毋庸置議○癸巳先是同治七年總理各國事務

衙門發定上海洋涇浜設官章程照會各國使臣於上海英國租界設立會審公廨選派同知用候補知縣陳福勳爲會審委員並由英美等國領事各派副領事緝譯等官按日輪流至公廨會審凡英美巡捕在租界查獲犯事之人均送公廨訊辦洋人控告華人亦歸公廨會審至是兩江總督劉坤一奏稱上海會審公廨委員既非實缺無俸滿升調之期卽不能與實缺官員一同遷轉致勞績久著者格於成例無可升除現在委員陳福勳任差十二年異常出力經臣專摺會奏懇 恩獎勵外此後會審公廨委員無論同通州縣選派是差擬請均作實職會審同知名曰差缺由臣會同撫臣奏明派委並自到差之日起扣足六年期滿辦理無誤照出洋異常勞績例專案保獎其廉俸等項仍不照實缺開支倘有辦理不善聲名平常者仍隨時撤換參辦奏入下部議等語於同知直隸州內揀選委派六年差滿後仍照原銜升轉允之○乙未以孟冬時享 太廟 上前期親詣行禮○以山東黃河安瀾予山東總兵官王正起等優敘有差○丁原任兩江總督沈葆楨於本籍福建建甌○直隸東明縣黃河南隄漫口○是月日斯巴尼亞國使臣伊巴里卒阿噶署理使事

冬十月丁酉徐文炯奏光緒四年十一月奉 旨停止捐納實職部議飭各省籌餉事例所報捐項以限內冊報到部爲準以後停止其現行常例統歸部庫按例銀實數收捐是於除弊之中仍得裕餉之策查

乾隆時常捐收數每年可得數百萬兩自籌餉例出與現行常例均准各省援請獎敘捐生希圖便利無復赴部捐納常捐遂因此而絕現在停止外捐規復常例雖前已捐者多庫收不旺數年以後亦必漸有起色乃近年來外捐實職雖停而常例中封銜等項尚有漏未截止者其端有三一曰滇黔之餉票捐查滇黔兩省軍務告竣所欠各營餉項給有餉票准其抵解捐銀以售票之款濟該省之用近年捐局日多票成日減大約取票之時餉票百兩僅售實銀五六兩上兌之日餉票六十兩即抵例銀百兩辦捐委員暨銀號願因此射利停捐以後冀謂此弊可絕乃滇黔捐局尚有虛銜封典未經截止查戶部常例每例銀百兩連加費須交實銀一百一十餘兩滇黔局以餉票抵捐祇須交實銀一十餘兩除扣七釐公費及部餉匯費支銷外例銀百兩所得實銀不過數兩是在滇黔局報捐一銜封凡該省多數兩之挹注即部有百兩之虧耗其不便孰應准令捐生赴部報捐銜封一項每例銀百兩再搭交餉票三十兩滇黔捐例一概停止至所收餉票每百兩另提實銀五兩存儲俟一年匯數發給該省則常捐漸可起色而餉票仍可收銷矣一曰福建之茶捐查茶商運茶出售按箱報捐向准匯數請獎其實此項捐輸與釐金無異原屬無庸請獎停捐以後如浙江之海塘捐絲捐均經奏請停止獎敘茶捐與絲捐相同應飭令該省不准請獎以昭畫一一曰各省之工賑捐工捐如挑河修橋等賑捐如捐助直督賑務此等善舉原

有議敘章程以爲獎勵近每援請常例給獎亦屬過優應請將未經請獎之工賑各捐若係一人樂輸仍查照向章議敘如屬市商公資及勸募集湊並無主名往往所捐未能得獎所獎非其所捐應只令地方官分別酌加獎勵無庸請給議敘總而論之外捐之流弊不絕則部捐常例終多阻礙擬請飭下部臣將以上三項援照常例請獎之處一律停止上諭御史徐文洄奏外省各捐阻礙常例請飭部一律停止一摺著戶部議奏○諭李明埏奏提督黃少春遵旨前赴浙江一摺黃少春著署理浙江提督迅赴署任以重職守○戊戌鮑超奏臣於九月初六日由鄂起行沿途舟次擱淺二十三日始抵天津當與大學士直隸督臣李鴻章面商駐紮及戰守一切情形二十六日由津赴防一路繞道查看灤州昌黎樂亭形勢惟樂亭縣境地勢較高尤爲各處扼要且泥色堅固便於紮營該處西北距京師四百八十里西南距天津三百六十里東距山海關二百四十里又東距洋河口一百二十里南距清河海口五十里東南距老米溝海口四十里又南距甜水溝海口六十里誠爲適中之地海運糧草亦屬便易當與樂亭縣知縣王崧翰面商傳集紳士設立發賣柴草局以資購買據云北方風勁透骨所有帳棚一遇風雪必然朽爛須牆內另修土牆蓋搭營房方足以禦寒冷但時近隆冬土膏已凍如以乾土修築營壘已屬暫計至蓋搭營房則需帶潮之泥延至春暖勢必坍塌必來歲清明以後土脈稍融方能動土修理現在只可用高

梁梗遮蔽帳棚暫避霜雪再四思維均係實在情形不得不從極辦理臣一面督率將領營哨各官加意操演訓練以成勁旅且臣前於九月初五日在湖北武昌途次接奉諭旨直隸各屬迭被偏災地方元氣未復尤宜嚴明約束俾兵民得以相安等因欽此臣嚴加誥誡務令恪守紀律秋毫無犯以仰副我皇太后皇上軫念民瘼中微戎行之至意至防守一切機宜隨時偵探與大學士直隸督臣李鴻章山西撫臣曾國荃會商妥籌總用布置妥協有備無患和衷共濟以上紆宵旰之憂勒得旨知道了著仍遵前旨約束兵丁並將防務隨時整頓與李鴻章曾國荃妥籌辦理○己亥諭軍機大臣等有人奏中城副指揮白荃聚賊縱賭聲名甚劣該坊地面開設賭局數處顯係得賄包庇西珠汎都司道過春與白荃同惡相濟等語著都察院堂官暨步軍統領等分別確查奏參○諭軍機大臣等前據總理各國事務衙門奏議結琉球一案又據右庶子陳寶琛奏球案不宜遽結舊約不宜輕改當經惇親王等酌議宜照總理衙門所奏辦理業經允准旋據左庶子張之洞奏日本商務可允球案宜緩復經惇親王等議以日本與俄深相邀結又與福建江浙最近今若更動已成之局未必甘心且恐各國從而構煽卒至仍歸前說或併二島而棄之益為所輕等語自為揆時度勢聯絡邦交起見惟事關中外交涉不可不慎之又慎李鴻章係原議條約之人日本情事素所深悉著該督統籌全局將此事應否照總理衙門原奏辦理並

此外有無善全之策切實指陳迅速具奏總理衙門摺片各一件單三件陳寶琛張之洞摺各一件均著鈔給閱看○諭軍機大臣等詹事府左庶子張之洞奏劉維楨劉連捷兩軍平日空籍太多臨行湊募劉維楨所部多係黃陂孝感游手浮惰之徒劉連捷所部半是直隸山西沿途烏合之輩等語山海關防務極為緊要若如所奏劉維楨劉連捷兩軍平時既多缺額臨行湊募成軍緩急豈能得力著會同奎按照所奏各節確切查明據實具奏毋稍迴護○庚子賜黃培松等一百七十七人武進士及第出身有差○左宗棠奏請酌減甘涼肅三府州提鎮各屬窮苦番族貢馬允之○諭奕榕等奏請飭調軍防守一摺據稱前經咨商李鴻章調撥宣化練軍二百五十名赴庫以資鎮攝嗣准李鴻章咨覆難以抽調現在防務緊要請飭或仍酌調宣化練軍或挑選各鎮原營步隊一二千名赴庫等語宣化練軍暨直省步隊能否調撥著李鴻章酌度具奏○飭發五城貧民棉衣銀兩○辛丑予通州王恕國等處煮賑米石○乙巳慈福端佑康頤昭豫莊誠皇太后萬壽聖節 上詣 慈寧宮行禮○丙午銘安奏請暫停冬剛允之○己酉諭文煜穆騰阿奏棍徒糾夥販運私酒聚眾傷斃差役請飭嚴訊一摺棍徒孫太古等販運私酒經巡役王瑞等緝獲該夥犯膽敢中途攔奪並將巡役王瑞搶去復拒捕毀傷差役實屬目無法紀現獲之孫太古孫春榮朱福禮趙二等犯著刑部嚴訊究辦至巡役王瑞被搶身死該城指揮何以先不相驗遽行

掩埋遲延多日始行會驗難保不另有情弊著巡視西城南城御史查明據實參辦○庚戌諭御史莫勒
辰額奏考試恩監生請仿照貢院別項考試辦理及八旗文童府縣接連考試請明定章程各摺片著禮
部議奏○諭軍機大臣等彭玉麟奏復陳調撥長江水師等事一摺另片奏請飭趕造十七八丈長之小
兵輪十隻此船重在頭梢兩礮亦酌配邊礮以輔之以爲江陰以下海防之用仍交李朝斌同操等語著
劉坤一穆圖善何璟張樹聲吳元炳勒方筠俗覓紫兆棠會商妥辦○大學士寶鋆署禮部尚書李鴻藻
與駐華美使安吉立暨專使等續修條約四款又續補條約四款成其文曰 大清國 大皇帝大美國
大伯理璽天德前於咸豐八年即一千八百五十八年議定和約及同治七年即一千八百六十八年續
增條約允宜永遠信守今大美國因華工日往日多難於整理尙欲彼此商酌變通仍與和約條款不致
相背是以 大清國 大皇帝欽命總理各國事務武英殿大學士全權大臣寶署禮部尚書全權大臣
李太美國大伯理璽天德欽命來華辦理修定事宜全權大臣卹卹中華便宜行事全權大臣安來華
辦理修定事宜全權大臣笛各將所奉 諭旨公同閱看就其可以變通之處彼此商酌變通特列條款
於左 第一款 大清國大美國公同商定如有時大美國查華工前往美國或在各處居住實於美國
之益有所妨礙或與美國內及美國一處地方之平安有所妨礙 大清國准大美國可以或爲整理或

定人數年數之限並非禁止前往至人數年數總須酌中定限係專指華人續往美國承工者而言其餘
各項人等均不在限制之列所有定限辦法凡續往承工者只能令其按照限制進口不得稍有陵虐
第二款 中國商民如傳教學習貿易游歷人等以及隨帶並雇用之人兼已在美國各處華工均聽其
往來自便俾得受優待各國最厚之利益 第三款 已在美國各華工及他項華人等無論常居暫住
如有偶受他人欺侮之處美國應即盡力設法保護與待各國人最優者一體相待俾得各受按約應得
之利益 第四款 兩國既將以上各款議定美國如有時按照所定各款安立章程照知中國如所定
章程與中國商民有損可山中國駐美 欽差大臣與美國外部公同妥議中國總理衙門亦可與美國
駐京欽差大臣公同妥議總期彼此有益無損 以上續修條約各款現在 大清國大美國各大
臣同在京師議定繕寫漢文洋文各三分先為畫押蓋印以昭憑信仍候兩國 御筆批准總以一年為
期在中國京都互換 續補條約四款 大清國 大皇帝大美國大總理暨大德現因兩國條約尚有
未備之處 大清國 特派總理各國事務武英殿大學士全權大臣寶善禮部尚書全權大臣李鴻章
國特派來華辦理修定事宜全權大臣卬駐劄中華使宜行事全權大臣安來華辦理修定事宜全權大
臣簡公同商定另立條款附於條約之後 第一款 中國美國將來益敦和好所有兩國商民貿易等

事於兩國均屬有益之處可以彼此共同商議 第二款 中國與美國彼此商定中國商民不准販運洋藥入美國通商口岸美國商民亦不准販運洋藥入中國通商口岸並由此口運往彼口亦不准作一切買賣洋藥之貿易所有兩國商民無論雇用本國船別國船及本國船為別國商民雇用販運洋藥者均由各本國自行永遠禁止再此條兩國商定彼此均不得引一體均需之條講解 第三款 中國允美國船隻在中國通商各口無論該船載美國貨物與別國貨物其進口出口及由此口進彼口之稅與其所納之鈔均照中國船隻及各國船隻一律徵納並不額外加徵亦不另徵他項稅鈔美國允中國船隻或由中國通商口及他國各口進美國各海口或出美國各口前往他國各口及回中國通商各口無論載中國貨物與別國貨物均照美國船隻及各別國於美國船隻不額外加徵稅鈔之國一律徵納進口之稅與其應納之鈔並不額外加徵亦不另徵他項稅鈔 第四款 倘遇有中國人與美國人因事相爭兩國官員應行審定中國與美國允此等案件被告係何國之人即歸其本國官員審定原告之官員於審定時可以前往觀審承審官應以觀審之禮相待該原告之官員如欲添傳證見或查審駁訊案中作證之人可以再行傳訊倘觀審訊之員以為辦理不公亦可逐細辯論並詳報上憲所有案件各審定之員均係各按本國律法辦理 以上條款繕寫漢文三分洋文三分先由兩國大臣蓋印押俟

大清國 大皇帝大美國大伯理爾天德 御筆批准後彼此互換以昭信守○辛亥命前吏部尙書毛昶熙仍在總理各國事務衙門行走○丁寶楨奏黔邊鹽務上年改辦官運因黔省凋敝之餘鹽釐過重有礙銷路當經奏定每年由川認解黔釐銀六萬兩計每引不過攤銀四兩俾成本輕減商販易於行銷冀可漸次規復舊岸嗣開辦後迭據各商呈稱黔省釐卡雖已裁撤釐金由川認解而距鹽入黔經過各關卡徵收鹽稅及各項經費合計每引共須納銀四五十兩不等商力實難支持懇請商裁減臣伏查黔省鹽稅部定科則每年止七千餘兩惟地方向來拮据又經兵燹之後辦理一切撫綏善後事宜各處籌設書院義學孤貧義助棲流所育嬰堂報資站費硝磺工本緝捕經費修河修路以及塘卡哨房等項經費均須籌款羅掘爲難不得不設法徵收藉資挹注第不議裁革則成本過重加以官吏需索書役留難各商畏阻不肯運鹽直入腹地銷售荒廢口岸終不能一律開通於川省引課既多停積亦於禁川復准大局有礙若盡予裁革則黔省各項經費均無所出地方公事又無從措手三月間臣與貴州撫臣岑毓英在赤水晤商再四籌商並核算黔省各項經費每年需用實數計運稅銀七千兩每水引一道須共徵銀十兩始敷分撥設卽於川鹽入黔之承仁黎清四岸按引總徵解黔一稅之後黔中各關卡概不准分釐重徵需索留難庶能涓滴歸公不致別生弊竇第此項收數雖較以前裁減三分之一然必須出自

各商情願始能照辦若商情稍有不順即不能稍事抑勒當飭唐炯傳集各邊岸商號到商公同妥議該商等深明大義以爲現議收數較前已減去大半黔省地方瘠苦若不稍資商力地方公事亦難辦理商等具有天良豈敢不思急公遂各欣然樂從頗形踴躍今試辦兩月銷引較多鹽價亦減商民毫無間言據各該商情願永遠遵守官運並現議稅釐一切章程辦理呈懇唐炯詳請具奏立案以資恪守臣等查現在時勢艱窘官吏之浮收亟宜嚴禁而辦地方一切亦實有不能不稍爲變通之勢但商情一有不便諸事即滯礙不行今鹽稅復歸定章而各項經費又照從前裁減三分之二又不受各關卡需索刁難商人暗中多獲便宜是以羣情大順爭先領運以期深入行銷使商民得以食賤而黔省辦公經費有著亦不至動形掣肘自可永遠遵行至徵收稅釐及各經費既議於四岸總收本應山黔委員辦理惟現屬試辦一切情形黔省委員亦不能熟悉現擬仍由川局代爲徵收分解俾免輾轉以致商情疑懼報聞○壬子諭御史鄧慶麟奏近來前三門外明火搶劫之案層見疊出破案絕少並有棍徒分黨成羣假冒宗室訛詐搶奪及詐稱巨室官親密友言官門客家丁專以探聽官事編造謠言藉端嚇詐等語聲嚴重地理宜整頓捕務肅清地面豈容不法之徒肆行無忌著步軍統領衙門順天府五城一體嚴密查拿並出示剴切曉諭毋任匪徒潛跡擾累聞○癸丑諭宗人府奏應封宗室業已當差可否仍准入考一摺應

封宗室溥良溥興均著准其照例考試一體授職○頒給直隸靜海縣 城隍廟 龍王廟匾額○甲寅
諭前因文煜穆騰阿奏棍徒販運私酒傷斃巡役王瑞該城指揮不先相驗遽行掩埋遲延多日始行會
驗當諭令巡視西城南城御史查明參辦茲據嵩林文敬等各據實覆陳案關棍徒運私傷斃巡役而應
根究明確以成信讞何以王瑞身死南城初次相驗與西城會驗情節參差且與海巡方順所報毆傷斃
命亦有不符著刑部卽將此案詳細審訊務得確情按律辦理○丁巳諭據禮親王世鐸等奏奉命恭送
穆宗毅皇帝 聖容 寶錄 聖訓前赴盛京恭奉尊藏禮成欽惟我 穆宗毅皇帝 乾坤法象
日月照臨 文治遐敷 武功丕著 寶錄 聖訓卷冊閱富億載昭垂茲者 上儀迭舉同蒞 陪都
周道兼旬喧和雁序禮成之時風清日曜大字昌明並值 冊 寶 玉牒同時尊虔仰維 在天默佑
吉事有祥寶深敬慰所有派往護從之王大臣官員等祇肅隨行恪恭將事允宜特加恩敘禮親王世鐸
肅親王隆懋同書徐桐侍郎桂全興廉著侍郎程祖誥及乾清門侍衛暨各侍衛並派出隨往之提調纂
修收掌及執事各官又恭送 冊 寶 玉牒隨往執事各員均著交部議敘其山京恭送至山海關之
護軍統領恩全直隸道員副將等自關外迎護之侍郎綿宜副都統謙德府尹松林接送隨護之副都統
姚田古尼音布恩佑並記名副都統協領崇善關內外承辦棚座橋道各官員著查明一併交部分別量

予議敘派出沿途護送滿漢官員兵丁著查明食俸官員各部議敘食餉兵丁每人賞給半月錢糧以示
朕錫慶施恩有加無已至意○諭現在天氣漸寒所有食餉之閒散宗室覺羅人等生計維艱殊深軫念
加恩著照現放章程給兩月錢糧其宗室覺羅孤寡除有恩賞一月錢糧外著再加賞一月錢糧以示
體恤○徵京師八旗綠步各營兵丁一月錢糧○戊午諭繼格等奏滿漢監督一時礙難同易生手請將
漢監督接辦漕務一摺坐糧廳漢監督何桂芳著准其再行接辦一年嗣後不得援以為例○庚申諭御
史郝純嘏奏戶部盤查寶泉局庫當十大錢虧短其鉅所有制錢以經費不足未經盤查難保必無虧短
等語此次戶部寶泉局庫當十大錢有無虧短是否未將制錢盤查著戶部據實具奏○葆亨奏山西大
祿之後物力凋敝頻歲以來經撫臣曾國荃銳意經營舉凡丁賦之缺額田畝之荒蕪差役之煩苛攤捐
之積累一一設法補救仰蒙 恩綸迭沛廓清夙弊與民更始惟裁革陋規一節迭奉 諭旨飭令悉心
革除並准吏部咨抄御史孔憲毅奏事府左庶子黃體芳條陳令將直隸臬司道府節辭陋規名目永遠
裁革仿照江西福建安徽章程體察情形酌提公費等因臣在藩司本任節經稟商撫臣曾國荃籌論數
四因管省地處山陬既無關稅之盈餘亦無漕折之餘羨擬仿江西安徽福建等省所定新章酌提公費
實屬無可挹注而臬司道府等衙門毫無入款專恃廉俸一項自軍興以來所領養廉除減成減半外又

復加有本省攤捐各款實領之銀爲數無多罄一年雇俸所入不敷延聘幕友三五人之用遑問其他自宜設法津貼以資辦公查江蘇蘇常等府裁革節餉規於州縣錢漕羨餘項下酌提公費按月解送行之幾二十年尙無流弊本年河南撫臣涂宗瀛奏定章程道府公費於所屬州縣內除苦缺不計外核其所餘多寡酌提銀兩由各州縣按季解奉 旨允行在案山西情形尙遜河南臬司道府等署昔日陋規其數較之他省爲減前因頻年災祲辦理賑撫事宜未暇顧及第恐日久保無故態復萌漸滋流弊撫臣會同岑屢與臣議與其日久流弊曷若明定章程妥議仿照河南成案體察各州縣情形有昔優而今瘠者亦有昔瘠而今優者分別勻派比照往時陋規數目通計再行量加核減一二三成不等作爲公費詳明立案亦由該州縣備文申解各該衙門承爲定章惟缺分之優瘠今昔既有不同歷久自必互異擬嗣後每屆十年公同酌核定一次以昭平允而歷久遠其一切節節陋規名目概行裁革自此次定章之後如有藉於積習仍蹈故轍者卽行查明嚴參又歷來省會向有由縣供應上司初至則有庫衙之費春秋則有換季之名臣亦已同司道出示禁革並仿照陝甘督臣左宗棠前在閩浙總督任內釐定福建章程由各署自行辦理不得取諸縣中免致苛派商民查督省本有生息公用銀兩原備本省雜差之用每屆年終將所用數目彙奏一次擬卽於此項之內撥歸撥濟用亦不准另行開支他款以示限制下

部知之○辛酉予湖北漢陽縣孝女陳熊氏旌表○壬戌理藩院尚書察杭阿卒予祭葬賞其子一品廕
牛錫昭以郎中用○以肅和爲理藩院尚書麟書爲左都御史轉烏拉嵩阿爲吏部左侍郎調奎潤爲
吏部右侍郎以燾年爲兵部左侍郎寶森爲盛京兵部侍郎○以吉和爲鑲藍旗蒙古都統○諭富陞奏
特參不顧體統之大臣並旨嚴議一摺此次禮親王世鐸等奉派前往盛京恭行典禮十月十二日將
軍岐元等在奉天府尹衙署設席款待乃盛京兵部侍郎紹宜起立離席向禮親王世鐸笑語無節甚
至輕躁失儀任意戲謔實屬有玷官箴紹宜著卽行革職以示懲儆至賀王筵宴亦酬酢之常惟差務未
竣遽行宴會亦有不合禮親王世鐸禮親王隆懃禮部尚書徐桐禮部侍郎桂全工部侍郎興廉署工部
侍郎程祖誥盛京將軍岐元副都統富陞盛京戶部侍郎恩福刑部侍郎啟秀工部侍郎興恩奉天府府
尹松林府丞潘斯澐均著交各該衙門議處富陞因紹宜不顧體統具摺糾參乃毫無顧忌輒敢將仰翼
之詞登諸奏摺實屬旨昧糊塗著再行交部議處至所稱奉天省會日以酒食游戲相徵逐似此縱逸成
風安能盡心公事嗣後該將軍等務當消除積習力矢勤慎倘敢再蹈前轍定行懲處不貸○戈靖奏吏
部銓政自軍興以後保舉太濫各省道府等官缺出盡扣外補以致內選壅滯累經臣工奏請吏部議准
定章現在道府知縣內選漸次疏通無遺議矣惟知州一途未曾議及所有缺出各省盡扣外補自去年

七月以後至今一年有餘並無內選一人未免偏枯竊思州縣事同一體惟知州之缺較知縣不過十分之一而在部候選者較知縣亦有十分之一人缺多寡不甚懸殊外扣內選亦當畫一查同治七年吏部議覆御史臣李德源疏通選法一摺嗣後各省知縣凡參革缺出盡扣外補丁憂缺出統歸部選等因奏准在案惟知州一項未曾議及是以仍形壅滯未免向隅相應請 旨飭下吏部嗣後知州缺出擬請仿照知縣定章凡遇丁憂遺缺亦令送部歸選抑或別議專條俾內外俱得其平庶足以昭公允 上諭給事中戈靖奏知州選班壅滯請飭部仿照知縣定章辦理等語著吏部議奏○甲子諭欽奉 慈禧端裕康慶昭和莊敬皇太后 慈禧端佑康頤昭豫莊誠皇太后懿旨醇親王奕譞著管理神機營事務佩帶印鈐寶鑒著並管理該營事務伯彥訥謨著毋庸管理○命孫家鼐錫珍查勘歲修 東西陵工程○是月荷蘭國使臣費果蓀回任